

891.99 .092

U - 994

1912 № 1810. 13 APR 2011

ԹԱԴԵՍ ԱՒԴԻՐԵԳԵՍՆ

ԳԻՎԼԻՈՏԵՐԱ
ԻՆՍԻՏՈՒՏԱ
ՎՈՏՈՎԵԴԵՆԻՈ
ԱԿԱДЕՄԻԱ ԽԱՆ
СССР


ՅՈՂԻ ՎԻՃԱԾԸ

ՄՈՒՐԱՅԱՆԻ ԵՐԿԵՐՈՒՄ

Պատմական—դրական վերլուծութիւն



1912



246 05

арм
4622

891.99.092

15-99ч.

ԹԱՂԵՍ ԱԿԴԱՐԵԳԵԱՆ

ՀՈՂԻ ՎԻՃՏԵ

ՄՈՒՐԱՅԱՆԻ ԵՐԿԵՐՈՒՄ

ՊԱՏՄԱԿԱՆ—ԳՐԱԿԱՆ ՎԵՐԱՌԵԽՈՒԹԻՒՆ

БИБЛИОТЕКА
ИНСТИТУТА
ВОСТОЧНОЕДЕНИЯ
Академии Наук
СССР



1912.

ՀՈՂԻ ՎԻՇՏԸ

ՄՈՒՐԱՅԱՆԻ ԵՐԿԵՐՈՒՄ

ՊԱՏՄԱԿԱՆ — ԳՐԱԿԱՆ ՎԵՐԱՊԵՏՈՒԹՅԻՆ

I.

Հայոց նոր գրականութեան այն փոքրիկ ածուն, որ պէտք է լինի մեր քննութեան առարկան, ուսւահայ այլախօսիկ վիպասանի, շնորհալի իւմորիստի-Մուրացանի երեք երկերն են. «Խորհրդաւոր միանձնուհին», «Նոյի ագռաւն» ու «Առաքեալը», որոնք թէև հեղինակի գեղարուեստական ստեղծագործութեան մի փոքրիկ մասն են կազմում, բայց և այնպէս գրականութեան զարգացումն ուսումնասիրողի համար յատուկ նշանակութիւն ունեն: Մուրացանի երկերի միջից այս երեքն առանձնացնելը քմահաճոյքի արդիւնք չէ, այլ հիմունական է նրանց ներքին կապի վերայ. այս երեք երկը միասին կազմում են մի ամբողջութիւն, որ նուիրուած է հասարակական նշանաւոր հարցերից մէկի. — Հայ գիւղի գրութեանը:

1904 թուականին իւր գրուածքների հրատարակութիւնն սկսելիս՝ Մուրացանը «Երկասիրութիւնների» առաջին հատորում ընթերցողին ուղղած երկողի մէջ գրում է.

«Նիւթերը փոխանակ ժամանակագրական կարգով դասաւորելու, ինչպէս առհասարակ ընդունուած է անել, բարւոք դատեցի համագրել ներքին բովանդակութեան համաձայն, որպէս զի կարելի լինէր միենոյն հատորի մէջ միաժամանակ ամփոփել այնպիսի երկեր, որոնք իրար հետ ունին որոշ կապ, կամ որոնք միասին առած կազմում են մի ամբողջութիւն: Այս իսկ պատճառով ներկայ հատուրը . . . ամփոփում է իւր մէջ ա. «Նոյի ագռաւը», բ. «Առաքեալը» և գ. «Խորհրդաւոր միանձնուհին», որոնք թէպէտ լոյս են տեսել զանազան ժամանակներում և ունին



60817-67

Վ.Ա.ԴԱՐՇԱՊԱՏ

ԵԼԵՔՄԱՂԱՐԺ Տպարան Մայր Աթոռոյ Ա. Էջմիածնի:

տարբեր նիւթեր, բայց, ըստ գաղափարի էութեան, կազմում են մի ամբողջութիւն։

Գեղարքունիքական այս ամբողջութիւնն արդիւնք է XIX դարի երկրորդ յիսնամեակի կովկասահայ հասարակութեան տնտեսական-սոցիալական կացութեան, վերջինս աւելի լաւ հասկանալու համար անհրաժեշտ է միքանի խօսք ասել նոյն դարի առաջին յիսնամեակի մասին:

XIX դարի առաջին յիսնամեակում գիւղացիութիւնն ընդհանրապէս անտեսական բարօր դրութեան մէջ է գտնւում, գիւղերում դեռ ևս իշխում է գիւղաւորապէս ընական, փակ, տնային տնտեսութիւնը. փողի ձգտումը հասարակական այս խմբի մէջ տնտեսական գործունեութեան նոպատակ չէ. հողի աակաւութիւն նպնպէս չէ զգացւում: Գիւղացիները թէե հարստութիւնով միմեանց հաւասար չեն, բայց գիւղում սոցիալական շերտաւորումներ գեռ ևս չկան, կարգերն ու բարքերը լիովին նահապետական են:

Խաչատուր Աբովեանը «Վերը Հայաստանի» վեպի մէջ՝
հիացած այսպէս է նկարագրում այն ժամանակուայ գիւղագու տունն ու նահապետական նիստ ու կացը։

«Տունն ու շիրախանէն հազար բարութիւնով լիքը
տրաքում էին ու Աստուծոյ հոգի կար մէջըներում . . .
Գիշէն կարասներով շարած . . . մառանը եմիշով, կախա-
նով, տանձ ու խնձորով խլթխլթում ու մտնողին հոտը
տեղն ու տեղը բռնում, շշմացնում էր: Նրա հարան ու
փեսէն կամ մէկ ազիդ զոնազը, որ գլուխը բարձին չէր
զնում էս անմահական բարութեան մէջը, էնպէս իմա-
նում էր, թէ դրախտումն ա աչքը խփում կամ բաց
անում: Որը երկու, որը երեք բաղ ունէր, նոքար, հօ-
տազ գռանը հազիր, ու տան ներսն ու պուճախը դրըմ-
քում էր: Կարասներով կողակ, կճճներով պանիր ու ղա-
ւուրմա, աքաշներով զոխ, բոխ, ողորմակոթ, բղզներով
եղ ու կարագ, մոթախներով պանիր.-ծճվ, ինչ տուն: Տա-
սը զոնազ որ էն սհաթը նրա դռանը վէր գային, սադ
մէամիս ուտէին, խին . . . նր ա տանխէրն ու բարպեաւ

թը հա կար, հա կար . . . Մէկ փարի բան բազարիցը
տուն չէր գալ, էն էլ կտաւ, շապկացու, չուխացու. շա-
տը հարսներն ու աղջկերըն էին նրանց համար մանում,
գործում, կարում: Նրանց կնանոնցը որ մաիկ տայիր,
խելքդ կերթար, խաս ու զումաշի միջում կորած էին . . .
Մէկը մէկի ջգրու շատ անգամ իրանց օղլուշաղին ենպէս
էին ծաղկում, զարդարում, ինչպէս գարնան վարդը, . . .
Շատը չորս հինգ հարսնուներ տանը, որ մէկ տեղը ցա-
ւելիս ուզում էին զլիովը պտիտ դան ու ոտները կում
անեն, խմեն: Մէկ բան ուզելիս ոտի տեղ գլխի վրայ էին
դնում, որ նրա ասածն անեն, ու ձեռըները դոշըներին
դրած աշքը կթած ունէին, որ տեսնեն, թէ իրանց տէրը
կամ զօնազը ինչ հրամայի, որ կատարեն: Կեսուրը կամ
կեսառը մէկ աշքը քցելիս ուզում էին տեղն ու տեղը
հային, էնքան հնագանդ էին»⁴⁾

Աբովեանի տասնը հաստատում է Ղազարս Աղայեանը «Բաժանութիւն» կոչուած պատմուածքի մէջ, որը մինչև այժմ ուշադրութեան չէ արժանացել, չնայած որ պարունակում է գրականութեան պատմագրի համար մեծ արժէք ունեցող փաստեր:

«Պէտք է ասել,-գրում է «Արութիւն և Մանուէլի» հեղինակը,—որ Սմբատի մանկութեան ժամանակ նրանց գիւղաքաղաքում նահատետական սէր և բարեկամութիւն կար։ Չարութիւն եթէ կար, դիտակցական չէր, այլ մանակական։ Մեծ մարդիկը այնքան միամիտ էին, որ երեմն մանկական չարութիւն էին անում։ Մարդիկ չէին տարբերութ ոչ մի բանով, ամենքն էլ դաղափարակից էին միմեանց, մէկ հաւատ ունէին, մէկ յոյս ու մէկ սէր։ Զկար անհատական ազատութիւն, բայց նրա գոյութիւնն զգալի չէր ոչ ոքի։ Կանայք նոր ձեռի հագուստ հագնելը իրանց համար անպատճեթիւն էին համարում, մեծերի մօտ շխոսկան մնալը՝ փառք ու պարծանք։ Մարդ անխըզ-

4) Խաչատրը Արքիկան, «Վէրք Հայաստանի»։ Թիֆլիս, 1908,
Հրատ. Յագուայ Հայ։ Կուլտ։ Միութեան, եր։ 54-56։

ճութիւն էր համարում զրկել նրանց իրանց այդ միակ մխիթարութիւնից։ Արտաքուստ ստրկութիւն երեցող վիճակն ստրկութիւն չէր, այլ մի նահապետական սրբացած ու ընտելմասնք գառած սովորութիւն, և գտնուում էր ոչ բռնութեան, այլ հայրական սիրոյ հովանաւորութեան տակ։ Մեծերի առջև փոքրերի՝ ձեռը սրտին դրած կանգնելը, ձայն ծպտուն շանելը, կուրօրէն հնազանդիլը մի թշուառութիւն չէր նրանց հտմար, այլ մեծ բախտաւորութիւնն Ազատ էին ջրերն ու անտառները, ազատ էին սարելն ու ծորենը, սակաւ էին մարդիկ եւ շատ էր տեղը. եւ մարդիկ ասլրում էին ինչպէս Արքահամի օրերում։ Ազգատ էին մարդիկ քաղաքակրթական պարագաներով, բայց գո՞ն էին իրանց վիճակից, ոչ մի բանի պակասութիւն չէին զգում, և ո՞վ է զգացել իր չտեսած բանի պակասութիւնը, որ նրանք զգային»։¹⁾

Փողային տնտեսութիւնը թագաւորում էր միայն քաղաքներում, որտեղ գրամագլուխն ամբողջովին գործադրում էր առեւտրական ու արհեստաւորական ձեռնարկութիւնների վերայ. վաճառական դասը գեռ ևս այնքան զօրեղ չէր. չկար արդիւնաբերական գործունեութիւն, չկային գործարաններ։

Քաղաքը գեռ չէր յաղթահարել գիւղին։

Եթէ ըստ Ղաղարոս Ազայեանի՝ նահապետական կարգերն ու լիութիւնը թագաւորում էին զիւղաքաղաքում, ապա հասկանալի է, թէ այս գրութիւնն որքան էլլինէր անարատ զիւղում։

1) Ղաղարոս Ազայեան «Բաժանութիւն»։ Տեսէք «Հայ գրողներ» Ա. գիրք։ Կազմեցին Ղ. Ա. Ազայեան, Ա. Ահարոնեան, Յովհ. Թումանեան եւ Վ. Փափակեան։ Թիֆլիս, 1909, եր. 34-55։ Բոլոր հատուածների մէջ ընդգծումները մերն են։

II.

Աբովեանի ու Ազայեանի նկարագրած հայ գիւղում «Մարդիկ ապրում էին ինչպէս Արքահամի օրերում»։ Իսկ ինչ գրութեան մէջ է հայ գիւղը Մուրացանի երկերում։ Արդեօք հինաւուրց կաղնու արմատներն առնդջ են ու թաղուած մայր հողի մէջ։ Արդեօք հայ գիւղացին առաջուայպէս ուրախ երգերով ակօսնում է գաշտը, սերմաննում արտորայքը և սննուցաննում իւր գաւակներին լիութեան մէջ։

«Հեռուից գիւղոն այնպէս է կարծում, — նկատում է քոյր Աննան, «Խորհրդաւոր միանձնուհու հերսուհին, — թէ գիւղացին սովորած լինելով պարզ ու անպաճոյն կեանքի՝ շատ աննշան էլ կարիքներ ունի, թէ նա միշտ գոհ է իւր վիճակից և թէ առհասարակ նրան շատ քիչ բան է պակասում։ Մի բան ճշմարիտ է. այն է, որ գիւղացին տրտնջալու և ամեն անցարդի իւր ցաւերը պատմելու սովորութիւն չունի, նա գիլխակոր և անմոռնչ աշխատում է, ինչպէս և իւր անասունը։ Բայց նա ամքողջովին կազմուած է կարիքներից։ . . . Այս, պէտք է ապրել նրա ընտանիքում, տեսնել եւ շօշափել նրա աղքատութիւնը, ներկայ լինել գաշտում նրա կրած տանջանքներին և շափել այդ տանջանքների զնով ծեռք ըներած արդիւնքի չնշին արժէքը, որպէս զի մարդ կարող լինի զաղափար կազմել զիւղացու կարօտութիւնների մասին»։¹⁾

Եթք «Առաքեալի» հերսուը, Պետրոս Կամսարեանը հարցնում է, թէ ինչնու հայի գիւղը տգեղ ու կեղուտ է լինում, Զիմուլիսլու տանուտերը պատասխանում է.

«Ախալէր, խայի գեղն կեղտառ չընի, իմալ ըլնի, խայի զեղցու ցաւը, դարդը մէկ չէ, էրկու չէ, որ թորգի ու յիստակութենի ցաւը քաշի»։²⁾

1) Մուրացանի երկասիրութիւնները, առաջին հատոր, Թիֆլիս, 1904։ եր. 303-304։

2) Նախը եր. 472։

Հայի գեղցու ցաւը մէկ չէ, երկու չէ, բայց բոլոր ցաւերն ու գարդերն առաջանում են օրական հացը գըժառարութեամբ ձեռք բերելուց։ Այս գժուարութեան մասին գաղափար չունեցողներից մէկը ուզում է իմանալ, թէ ինչն է պատճառը, որ Զիբուխուն ուսումնարան չունի։

«Գեղականը որդիան կարայ ուսումնարան հիմնիլ, — նկատում է տիրացու Մոսին, Զիբուխուի վարժապետը։ — Սաղ օրը շարչարուիլով, արևի, անձրեսի հետ կռիւ տալով ըսկի կարում չի էնքան աշխատի, որ իրա թեխանց ուոզին հասցնի, եա նրանց տկլոր լաշը ծածկի, ուսումնարան մնց տի հիմնիլ։¹⁾

Անշուշտ քաղաքում աղքատութիւնը շատ աւելի տաշմանելի է, քան գիւղում. սակայն պէտք է եղրակացնել, թէ գիւղումն էլ աղքատութիւնն արդէն բաւական սուր կերպարանք է ստայել, որ «Նոյի ագուաի» մէջ գիւղարկան քահանան, Տէր-Մակուչը անշուշտ մի քիչ չափազանցելով ասում է.

«Իժար բան ա աղքատութինը, էն էլ զեղի միջումը, Աստօծ ոչ շանց տայ ձեզ. . . »²⁾

Այս բոլորը հաստատում է նաև ուստա Պետին «Առաքեալի» մէջ։

«Ըստեղ (գիւղում. Թ. Ա.) ոնց որ տղամարդը, էնենց էլ կինարմատը ուազ օրը գործ են շինըմ. չուն ցաւերնին շատ ա, կարիքնին մենծ. պաի անեն, որ ապրեն, ծէրը ծէրին հասցնեն. չանողը կմնայ սոված, նրան ոչ Աստօծ, ոչ էլ բանդէն հաց կտայ. Դրա համար ա, որ ըստեղի մարդը տան սիրունութենի, եա կարգ ու սարդի վրայ մտածում չի. չուն դէ սոված փորի հմար ամենից առաջ հաց ա հարկաւոր, տկլոր չանին էլ մի կտոր կտաւ. Դէ մարդ որ էղ էրկու ըանը զոռով ըլի ձեռք բերում, էլ ուրիշ բանի վրայ մնց կարայ մտածիլ։³⁾

Կասկած չկայ այլ ես, որ լիութեան գարն անցել է Գիւղացին գողում է վաղուան օրուայ համար, գոյութեան

զարհուրանքը տիրել է նրան. խուլ դժոհութիւնը պատել է նրա սիրով, ինչպէս խեղողով ու կապուտակ ծուշ կիսավառ խանձողը։ Մի ահեղամոռնչ հեղեղ պղտոր ամբողներով բաց է արել հինաւուրց կաղնու արմատներն և նրան մատնել չորանալու վտանգին։

III.

Բայց ինչո՞ւ մարդիկ այլ ես չեն ապրում ինչպէս Աբրահամի օրերում։ Ի՞նչն է այս փոփոխութեան պատճառը։

«Առաքեալի» հերոսը, Պետրոս Կամսարեանը այսպէս է խորհրդածում գիւղացիների մասին։

«Եարի մարդիկ են, ազնիւ և աշխատասէր. սեփական շահի համար ոչ ոքի չեն վնասում, այլ ապրում են իրենց ճակատի արդար քրտինքով։ Բայց որովհետեւ տգէտ են և անուսում, ուստի մնում են անզօր աշխարհի չարիքների առաջ, որով և մի կողմից բնութիւնն է նրանց զըրկում, իսկ միւս կողմից չար մարդիկն են կեղեցում. այդպատճառով էլ նա վարում է գառն ու չարքաշ կեանք։⁴⁾

Բայց հայ գիւղացին առաջ էլ էր տգէտ ու անուսում, ապրում էր նպն բնութեան մէջ, առաջ էլ նրա արտերին վնասում էին աւերիչ կարկուտն ու այրող երաշտը. Ուրեմն մնում է նրա թշուառութեան պատճառ. հաշուել կեղեցով չար մարդկանց. Բայց ինչ չար մարդիկ են սրանք։

«Եթէ այսօր Հասան-խանի ֆարսաշները չեն սպառնում նրանց, (գիւղացիներին. Թ. Ա.) հօ տգիտութիւնն ու խեղճութիւնը, հօ վաշխառուներն ու օրինազանցները սպառնում են, — մտածում է գիւղացու ցաւակից Կամսարեանը։⁵⁾

Ճիշտ է, պարսից տիրապետութեան օրերում օրինազանցներ չկալին, սակայն լոկ այն պատճառով, որ օրէնք

1) Մուրաց. երկ. եր. 204:

2) Նոյնը եր. 26:

3) Մուրաց. երկ. եր. 445:

4) Նոյնը, եր. 88:

5) Նոյնը եր. 426:

էլ չկար, և ուրեմն չարիքն անսահման էր։ Բայց ինչու այն ժամանակ, երբ բռնութիւնն աւելի շատ էր, գիւղացու տունն Արովեան՝ ասելով «ծով» էր, իսկ այժմ գարձել է սակաւաջուր մի առուակ։ Ինչպէս օրինազանցներին, այնպէս և վաշխառուներին գիւղացու աշխատութեան հիմնական պատճառ համարել չի կարելի։ Վաշխառութիւնը չի կարող զարդանալ այնտեղ, որտեղ մեծ կարիք չկայ։ Ինչպէս յետոյ աւելի մանրամասն կտեսնենք, ոչ թէ վաշխառութիւնը պիտի համարել աղքատութեան պատճառ, այլ ընդհակառակը, աղքատութիւնը՝ վաշխառութեան։

Ապա ինչի հետևանք է գիւղացիների աղքատութիւնը։ Ո՞րտեղ որոնենք գիւղացիութեան անկման պատճառը։

Հայ գիւղական դասակարգի անկման պատճառը ոչ նրա տգիտութիւնն է, ոչ խեղճութիւնը, ոչ բնութիւնն իւր արհաւերըներով, ոչ օրինազանցներին ու ոչ էլ վաշխառուները, այլ այն մեծ յեղաշրջումը, որ տեղի ունեցաւ հայ հասարակութեան կեանքում ՏԻԿ դարի երկրորդ յիսնամեակի սկզբներում։

ԱՄԵՐԿԱՆՈՒԹԵԱՆ (ՃՈՐՏՈՒԹԵԱՆ, Թ. Ա.) աղքատութիւնը և վերջն էլ դատական վերանորոգութիւնը, գիւղական ինքնավարութիւնը, նորամուտ լուսաւորութիւնը, երկաթուղի, հեռագիր և այլն, -գրում է Ղաղարոս Աղայեանը նոյն «Բաժանութիւն պատմուածքի» մէջ, -մին մինի յետենից գալով շլացրին ժողովրդին, մի յանկարծական փոփոխութիւն ձգեցին նրա նիստ ու կացի և վարք ու բարք մէջ։ Ժողովարդն այնպէս փոխուեցաւ մի տասը տարուան մէջ, որքան փոխուած չէր հարիւրաւոր տարիների ընթացքում։ Ինչ որ մի շահի արժեք առաջ, գառաւ քոսն շահի և աւելի ես. փողը շատացաւ, շոայլութիւնն էլ հետք, և այս վերջինը յաղթեց առաջինին, Առաջուան հարիւր մանեթով երջանիկ ապրողը էլ չկարողացաւ հազար մանեթով ապրել։ Մի նոր տեսակ գոյութեան կոխ սկսուեց, անմիտները յանկարծ սատանայացան, խելօքները խորամանկացան, աղնիւները խարդախացան, հաւատարմու-

թիւնը կորաւ, սէվը ստուաւ, սեփականութիւնը ձեռքից ձեռք անցաւ և այլն։¹⁾

Պէտքի փողն ու փողատէրը։ Ահա թէ ինչպէս էր մտածում այս մասին Քանաքեռոցի քեթխուղան։

Այս հատուածից երկում է, որ Աղայեանը լաւ չի գիտակցում, թէ այս յեղաշրջման բազմազան երեսյթների մէջ որոնք են պատճառ ու որոնք՝ հետեանք, բայց այնուամենայնիւ տալիս է տնտեսական ու բարոյական յեղաշրջման ընորոշ գծերը։

«Երկաթուղի, . . . հեռագիր . . . փողը շատացաւ . . . սեփականութիւնը ձեռքից ձեռք անցաւ . . . »։

Այս ծիծեռնակները ցոյց են տալիս, որ մթնոլորտում եղանակի փոփոխութիւն է կատարուել, Բնական, փակ տնտեսութեան գարն անցել է. լիովին յաղթանակել է փողային տնտեսութիւնը. գիւղն ու քաղաքն երկուների մէջ են. ծնուռմ է հարիւրդիսեան Հիդրան-ամենակուլ կապիտալիզմը։

Բնական, փակ տնտեսութիւնից փողային տնտեսութեան անցնելը գիւղացի գասակարգի համար օրհասական նշանակութիւն ունի։ Այս այն յեղաշրջումն է, որ գիւղացիութեան անկման պատճառ է գառնում։

IV.

Տեսնենք, թէ բնական տնտեսութիւնից փողային տընտեսութեան անցնելն ինչպէս է գիւղացիութեան անկման պատճառ գառնում։

Բնական տնտեսութեան ժամանակ գիւղացին արտադրում էր ոչ թէ շուկայի, այլ իւր համար. հարկաւոր իւրերի մեծ մասն ինքն էր պատրաստում ընտանիքի հետմիասին, իսկ պակասը լրացնում էր փոխանակութիւնով, որը կատարում էր ոչ թէ փողով, այլ իւրերով։ Բնական տնտեսութեան ժամանակ թէ սպառման ու թէ փոխանակութեան համար գիւղացուն հարկաւոր էր միմիայն բերք. բերք շատ ունի—հարուստ է, փող չունի,—դեռ ևս

1) «Հայ զրողներ. Ա. հատոր, եր. 55

աղքատ չէ: Հասկանալի է, որ բնական տնտեսութեան շըրշանում փողի պակասութիւնն երբէք չի անհանդուտացնում նրան. ընդհակառակը, գիւղացին արհամարհանք է տածում

«Տաշտումը հաց ունենամ, կարասումը՝ գինի, ջուառում՝ ալիւր, հէրն անիծած, որ չիփ-չիփլաղ էլ ըլիմ դարդ անեմ: Օջաղս լիքը ըլի, տանս՝ բարաքեաթ, որդիքս՝ սաղ սալամաթ, թողօրը հազար մարդ մտնի, հազար մարդ դուս դայ, ինչ եմ հոգում, հացն Աստուծունն ա, ես էլ հետը, ով հասնի, թող ուտի: Տէրին փառք, տեղը հլաշատ կայ, տղէքս սաղ ըլին, ջանս տպրի. Աստուած իր ստեղծած բանդի ուրզը ինչպէս կը կտրի: Գտակա ծուռը կդնեմ, քէֆս արամիշ կանեմ, ով թամբալ ա, թող նադարդ անի»:¹⁾

«Փողի բարաքեաթին էլ նալաթ, իրա կտրողին էլ: Էսօր չէրդ լցնես, էգուց պէտք է մատդ լզստես: Ոչ գիշերը քունդ ա տանում, ոչ ցերեկը՝ զարադք, Փորացաւ ընկածի պէս մարդ չի իմանում, թէ թիքէն որ կողմովն ա գնում: Փողը որ կայ, ձեռի կեխտ է. էս օր կայ, էգուց Աստուծով մխիթարիս: Մեռնիս պէտք է չներոց, գէլերոց ըլի: թէկուզ փողի համն առած, թէկուզ իր միսը կերած, հէսաբը մէկ աւ... Զէ, չէ, փողի սիքէն ճանաչողը ոչ հօգի ունի, ոչ հաւատ: Փողհող մին ա, Զարդար Պ. որ շատ փող ունի, հէնց էն ա, ինձանից մէկ թիզ բարձրացել առ լաւ ա ապրում: Նրա քօռ աշքը գիտենայ: Շատ փիքը անելուց երեսը կաշին գնացել, չոփ ա դառել, քամակն էկել, փորին գէմ առել, ատամները ցիցցից մնացել, աշքերը կուլ գնացել, մէկ որ փշես, հազար տեղ գունտ ու կծիկ կըլի, մէկ որ քթին հուպ տաս, հողին էն սհաթը կտայ:... Թհնէ, մարդ իրան հոգին պէտք է ծախի, որ փողին թամահ անի»:²⁾

Այսպէս չի կարող դատել գիւղացին փողային տնտեսութեան շըրշանում:

Փողային տնտեսութեան ժամանակ փոխանակութիւնը

կատարւում է փողով, այսինքն մի այնպիսի իրով, որից կարելի է անչափ հաւաքել և որը միշտ կարելի է փոխանակել մի ուրիշ իրի հետ, մինչդեռ ապրանքը կարող է սպառող չունենալ: Փողային տնտեսութեան ժամանակ գիւղացու հետ գործ ունեցողները, օրինակ՝ տէրութիւնը, հիւսնը, դարբինը և այլն, այլ ևս բերք չեն վերցնում իրարեւ հարկ կամ աշխատավարձ, այլ փող են պահանջում: Գիւղացին ուզում է ունեցածը տալ, նրանք ուզում են չունեցածն առնել: Բնականաբար առաջ է գալիս փող ձեռք բերելու ձգտում:

Փող ձեռք բերելու մեծ ձգտումն ստիպում է գիւղացուն իւր ու ընտանիքի ոյժը գործադրել բերք շատ արտադրելու վերայ. տնային ու դաշտային շատ աշխատանքներ ընդհատում են և աշխատանքը կենդրոնացնում այն նիւթի արաւագրութեան վերայ, որ ամենից աւելի արդիւնաւէտ է, իսկ այն նիւթերը, օրինակ, բուրդ, կաշի և այլն, որոնց վերայ աշխատանք էին գործադրում և սեփական սպառման առարկայ գարճում, այժմ վաճառւում են: Նշանակում է՝ գիւղացին այժմ ոչ միայն տէրութեանը կամ արհեստաւորին վճարելու համար փող պէտք է ունենայ, այլ և փող պէտք է վճարէ այնպիսի առարկաների համար, որ առաջ ինքն էր արտադրում ու սպառում: Մեծանում է փողի կարիքը, որա հետ մեծանում է գիւղացու կախումը շուկայից:

Բնական տնտեսութեան ժամանակ գիւղացին կախում ունէր բնութիւնից: Փողային տնտեսութեան ժամանակ գիւղացին կախում ունի թէ բնութիւնից և թէ շուկայից: Բնական տնտեսութեան ժամանակ բերք ունեցողը հարուստ էր, իսկ փող չունեցողը դեռ ևս աղքատ չէր: Փողային տնտեսութեան ժամանակ, ընդհակառակը, փող չունեցողը աղքատ է, իսկ բերք ունեցողը դեռ ևս հարուստ չէ: Փողային տնտեսութեան հակասութիւններից մէկն է այս լինել ունետր, բայց միաժամանակ ոչ հարուստ գիւղացին հարուստ կը լինի այն ժամանակ, երբ բնութեան առատաձեռնութեան հետ միասին շուկայի պայ-

1) «Աէրը Հայաստանի», եր. 57:

2) Նոյնը, եր. 56—58:

մաներն էլ բարեյաջող լինին: Այսպիսի զուգադիպութիւն սակայն յաճախ չի պատահում: ¹⁾

«Փո՞ղ, փող ու փող», — սկսում է բացականչել գիւղացին, որի գոյութիւնն այժմ կախուած է շուկայից: Եւ որովհետև արտադրող գիւղացին փողի կարիք ունենալիս մրցողների շատ լինելու պատճառով բերքին լաւ գին տուող ու սպառող գտնել չի կարողանում, ուստի ստիպուած է լինում աժան վաճառելու, որով հնարաւորութիւն չի ունենում բոլոր կարիքներին բաւարարութիւն տալ և ակամայից գիմում՝ է պարտքի: Իսկ եթէ չի կամենում բերքն աժան վաճառել, պահում է յարմար ժամանակի. բայց այս գեպըումն էլ գիւղացին հարկադրուած է լինում պարտք վերցնելու: Պարտքն էլ, յայտնի է, պտտող անիւ է. բաւական է, որ փէշից բռնեց. վաղ թէ ուշ քարշ է տալու ու փշրելու ամբողջ մարմինը: Հետեանքը լինում է այն, որ գիւղացին կամ դառնում է պարտատիրոջ ճորտը և կամ հողից զրկուած պրոլետար:

Փողային տնտեսութիւնն աղում է նաև հողային սեփականութեան ծաւալի վերայ: Փողի ծարաւն ստիպում է գիւղացուն, որքան կարիլի է, շատ հող ցանել: Գիւղացիներն սկսում են հետզհետէ վարել «ազատ գաշտերն ու ազատ ձորերը»: Զգացւում է հողի սակաւութիւն. սկսում է հողի ախրապետութեան համար մրցում: Այս

1) Հետեւեալ աղիւսակն աւելի կպարզէ մեր միտքը. Թէ, յիրաւի, փողային տնտեսութեան ժամանակ գիւղացու կացութիւնն-աւելի դժուարին է:

I. ԲՆԱԿԱՆ ՏՆՏԵՍՈՒԹԻՒՆ.

1. Բնութիւնն առատածեն է, — — գիւղացին հարուստ է.
2. » ծլատ է, — — » ազքատ է.

II. ՓՈՂԱՑԻՆ ՏՆՏԵՍՈՒԹԻՒՆ.

1. Բնութիւնն առատածեն է. շուկան բարեյաջող, գիւղացին հարուստ է.
2. » ծլատ է, » բարեյաջող, » ազքատ է.
3. » առատածեն է. » անբարեյաջող, » ազքատ է.
4. » ծլատ է, » անբարեյաջող, » ազքատ է:

Մինչեւ բնական տնտեսութեան ժամանակ գիւղացու լաւ պայմանները յարաբերում են վատերին, ինչպէս 4: 4-ին, փողային տնտեսութեան ժամանակ յայտաբարում են, ինչպէս 4: 5-ին:

կուռում, ինչպէս և ամեն կուռում, յաղթանակը տանում են աշխարհիս հզօրները. թոյլերը զրկուում են հողերից և Աղայեանի բառերով ասենք, «սեփականութիւնն անցնում է ձեռքից ձեռքք»:

Իհարկէ, գիւղացիական մասսայի բոլոր անդամները հաւասարապէս ենթակայ չեն այս վիճակին: Ոմանք կարողանում են բարեյաջող հանգամանքների շնորհիւ խուսափել անկումից ու որոշ չափով բարօր գրութիւնը պահպանել: Հարեանների աղքատութիւնը նպաստում է նրանց հարստութեանը: Այսպիսիները գիւղում հանդէս են գալիս. նախ իբրև պարտատէր և ապա իբրև մեծ հողատէր:

Եւ այսպէս, երբ փողային տնտեսութիւնը ներս է մտնում գռնից, գիւղացու բարօրութիւնը դուրս է թռչում երդիկից: Ոգեսեսի փայտեայ ձին պատճառ է լինում Տրոյայի կործանման: ¹⁾

V.

Մուրացանի երկերը ցոյց են աալիս, որ հայ գիւղն խոկապէս ճնշում է փողային տնտեսութեան ծանրութեան տակ:

1) Փողային տնտեսութիւնը վնասում է ոչ միայն գիւղացի, այլ եւ ազնուական դասակարգին: Դեռ եւս Ք. Ա. VII դարում յոյն բանասեղծներից մէկը, Թէոդոր Մեգարացին այսպէս է բողոքում փողային տնտեսութեան յաղթանակնու զէմ:

«Մինչև անգամ խոյերի, էշերի ու միերի միջից, ո՞վ Կիրն, միշտ զոկում ենք ազնուացեղը, եւ բոլորս էլ ընտիր ցեղից սերուածն է ցանկալի:

Բայց ազնուական տղամարդը ամենեւին վատ բան ցի համարում վատառնմիկին կին առնել, եթէ միայն սա իւր նետ փող շատ է սերում:

Կինն էլ չի բաշում վատառնմիկի ամուսին լինել, եթէ միայն սա հարուստ է, հարուստն աւելի սիրելի է նրան, քան ազնուականը:

Ամենքն էլ փողին են պատիւ տալիս. ազնուականը հասարակին է կին առնում, իսկ անտոհմիկն էլ ազնուականի տղջան. այսպէս փողը հաւասարեցրել է տոհմերը:

Էլ այսուհետեւ մի զարմանար, ո՞վ Պոլիպայի որդի, որ մեր ազնուական բարաբացիների տահմը ոչնչանում է. չէ՞ որ մեզանում առաքինութիւնն սկսուի է խառնուել մոլութեան նետ:

Ա. и М. Краузе. «Руководство по истории греческой литературы»
часть I, пер. С. И. Радцига. Москва, 1907, бр. 445.

Խօսելով այն մասին, թէ ինչպէս գժուարութեամբ էր գիւղականը ապրուստ ճարում, աշխարհ տեսած ուստա Պետին աւելացնում է:

«Այ, ուրիշ ա ձեր քաղքի բանը, ընտեղ փողը չիր ա էնքանը բիրդան ոնց են հւաքում, գիտում չեմ, միան էս կայ որ, մինը թէ աշխատումա, տասը մուֆթա են ուտում. ոչ ջափա կայ, ոչ նեղութին» ։)

Ուրեմն գիւղացու թշուառութեան պատճառն այն է, որ գիւղում «փողը չիր չի», որովհետև հեշտութեամբ չեն կարողանում ձեռք բերել: Կար մի ժամանակ, երբ գիւղացին առանց այս «ըրի» էլ լի կեանք էր անցկացնում, բայց այժմ առանց նրա ոչինչ չի կարելի ճարել:

Փողային տնտեսութիւնն այնքան է զարգացել գիւղում, որ ոչ միայն տէրութեան հարկը, արհեստաւորի վարձը, գործարանային ապրանքների գինը, այլ և սերմացուի արժեքը գիւղացին փողով պէտք է վճարէ:

«Մարդը սովածա էլել, — առում է Խոջա Միրզան, — փող եմ տուել, սերմացու ա տել. ցանել ա, հնձել ա, չորս տարի ապրել ա . . . ։»²⁾

Պետրոս Կամսարեանի նկատողութեանը, թէ ինչու խրճիթի առաստաղը ծուռ ձողերից է շինած, մինչդեռ կարելի էր լայն տախտակներից պատրաստել, հիւրընկալ գիւղացին, Զիբուխլուի տանուտէրը, պատասխանում է,

«Եատ զորթ ես հրամայում, ազա, զորթ որ էն ձուղերի տեղ թէ տախտակ հընէր, շատ լաւ կընէր. համ խող չեր թափուի, համ էլ յառիքը սիրուն կընէր։ Համա մէ բան կայ, որ դու չես գինայ. շինականի խամար մէ մանէթը էնդրդա աժի, ինչդրդա քաղցու խամար խարի մանէթը էսպարդա տեղը տախտակելու խամար եռասուն մանէթ խէրիք չեր գայ, համա ես էս հըմէնին չորս մանէթ եմ տուե, էն էլ անջախ եմ ճարել»³⁾

Երբ նոյն Կամսարեանը զարմանում է, որ մալականները

1) Մուրացանի երկաս, եր. 213:

2) Նոյնը, եր. 295.

3) Նոյնը, եր. 184:

վայտ են վառում, իսկ հայ գիւղացիները՝ աթար, ուստայ Պետին բացատրում է պատճառը:

«Նրանք հարուստ են, մենք աղքատ: Էն փողը, որ պտի տանը փէտի, տալիս ենք մի ուրիշ պակասութենի. օրինակ մի ձի ենք առնում, որ մեղ հմար բան անի. Եա կով ենք ձեռք բիրում, որնրա կաթով բեխանցը պահենք. Եա չէ շորի, փալասի ենք տալի, որ մեր տանեցոնց տկլորութիւնը ծածկենք. պակասութին շատ, ես որ մինն ասեմ:»⁴⁾

Գիւղական մի ընտանիք վերահաս կործանումից աղատելու, վերջնական անկումից փրկելու համար հարկաւոր է 131 ռուբլու չափ մի գումար, բայց ամբողջ գիւղում անհնարին է գտնել այսքան փող:

«Մեր էն խեղծ Սային. . . Բա էրէկ չասի, թէ Խոջան հրաման ա բերել, որ նրա էլած չէլածը ծախի: Այ, չմի պրիստաւը վէ կալած էկելա, խեղճի տունը կտրել: Քանի մարդիկ մէջ ընկան, խնդրեցին, աղաչեցին, թէ մի քիչ էլա մոհաթ տայ, ասաւ, «տալ չեմ. փողս բիրեք, տուէք, պրիստաւին վեր ունեմ, գնամ. թէ չէ, ինչ ունի, չունի, պտի վեր գրեմ, ինչ կլի, կնկանը շորերն էլ. . .»: Դէ մենք փող որդիսն զտնենք էս մաթին. Գեղականի ջանումն հալա մնացել, որ հաքի, տայ:»⁵⁾

Փողի մեծ կարիքն ստիպում է նոյնիսկ սեփական տընտեսութիւն ունեցող մարդկանց ուրիշի մօտ աշխատանք որոնել, իսկ տնտեսութեան հոգուը թողնել կանանց ու երեխաների վերայ:

«Ճենմաւ ես, — մատնացոյց արաւ Պետին աշխատողների վերայ, — սրանք Աւանանց բեխէքն են: Հէրը մենձ տղի հետ հրէն համեղումը ուրիշի հունձն անում, թէ ինչ ա, կարայ մի քանի շահի տուն սերել. ըստեղ էլ կնիկն ու աղջկերքը իլանց կալն են կալսում: Զորսն էլ կինարմատ են, պստիկն ա տղայ. ամա գէ գիփ էլ տղամարդի գործ են շինըմ:»⁵⁾

1) Մուրացանի երկաս, եր. 213:

2) Նոյնը, եր. 282:

3) Նոյնը, եր. 208:



Հայ գիւղացին տքնում ու ճգնում է փող ձեռք
բերելու համար. բայց մամանան ձկան պէս լպրծում է
նրա մատերի արանքից և ստուերի պէս փախչում նրա
առաջից։ Տանտալոսը տեսնում է պտուղներով ճթուած
ոստը, սակայն իզնւր. մի փոքրիկ շարժումն, և ահա հրա-
պուրիչ ոստն օրորւում է բարձրում։

VI.

Փոխանակութեան զարգացումը գիւղում մեծ կարիք
է առաջացրել. գիւղացիները պատրաստ են պարտք վերա-
ցնելու, ինչ պայմանով ուզում է լինի։ «Դայլն ինչ կուզի,
—մուժը գիշեր», —ասում է ժողովրդական առածը։
Հարուստ գայլերին էլ հենց այսպիսի մուժ գիշեր է հար-
կաւոր անդօր գառներ, յուսահատ սպառողներ գտնելու
համար։ Եւ խուժում են արիւնարբուները գիւղ. սկսում
է անխիղճ վաշխառութիւնը։

«Եթէ այսօր Հասան խանի ֆարրաշները չեն սպառ-
նում նրանց, հօ տգիտութիւնն ու խեղճութիւնը, հօ վաշխառուներն ու օրինազանցները սպառնում են նրանց»,
—խորհում է Կամսարեանը։¹⁾

«Կեղեքիշներից ու վաշխառուներից զատ դեռ մինչեւ
այսօր ոչ ոքի չեն տեսել իրենցմով հետաքրքրուելիս», —
նկատում է Թարսաշայի պոստի վերակացուն, «անասուն-
ների վարժապետը»։²⁾

«Եւ սակայն ըրբան շատ կային այդպիսի (վաշխառու-
ների ձեռքին գերի. Թ. Ա.) թողնուած ու լքուած տներ և
ընտանիքներ, —խորհում է տիսրութեամբ Պետրոս Կամսար-
եանը, որից իմանում ենք, որ վաշխի աւերածութիւնները
գիւղում մեծ չափերի է հասել».³⁾

Ուշադրութեան արժանի է ոչ միայն վաշխառութեան
զոհերի քանակը, այլ և վաշխառութեան որակը։

Վաշխառութիւնը երկու տեսակ է լինում. փողով
վաշխառութիւն, երբ պարտք են տալիս փող ու պիտի
ստանան փող, և բնական բերքերով վաշխառութիւն, երբ
պարտք են վերցնում բերքեր, որպէսզի յետոյ դարձեալ
բերք վճարեն։ Սիալ կինի կարծել, թէ բերքով ու փողով
վաշխառութիւնը հաւասար ազգեցութիւն են գործում
գիւղացու տնեսութեան վրայ։ Բերքով վաշխառութեան
լուծն ընդհանրապէս աւելի թեթև է գիւղացու համար.
Եթէ տարին բարեյաջող եղաւ ու բերքն առատ, նա հեշ-
տութեամբ կարող է պարտքն ու վաշխը վճարել։ Մինչդեռ
փողով վաշխառութեան ժամանակ գիւղացու՝ առատ բերք
ունենալը գեռ ևս հնարաւորութիւն չէ տալիս նրան
պարտքից ազատուելու. որպէզի նա ազատուի վաշխառուի
ճանկերից, պէտք է թէ բնութիւնն առատաձեռն և թէ
շուկան բարեյաջող լինեն։ Ասածներս ճիշտ է ինչպէս գիւ-
ղացու, այնպէս և կալուածատէր աղնուականի վերաբեր-
մամբ։

Հնում շատ լաւ էին գիտակցում բերքով ու փողով
վաշխառութիւնների մեծ տարբերութիւնը։

«Հին հռովմայեցի հեղինակները, —գրում է մեծա-
տաղանդ. Բելտովը, —եռանդագին բողոքում էին վաշխա-
ռութեան գէմ։ Կատոն ցենզորի կարծիքով վաշխառուն
գողից երկու անգամ վատ է (հենց այսպէս էլ ասում էր
ծերունին, ուղիղ երկու անգամ)։ Այս խնդրում հեթանոս
հեղինակների հետ բոլորովին համամիտ էին քրիստոնէ-
ական եկեղեցու հայրերը։ Սակայն —նշանաւոր երեսյթ — թէ
սրանք և թէ նրանք բողոքում էին փողային կապիտալի
բերքած տոկոսի գէմ։ Իսկ բերքերով վոխատութիւն-
ներին ու սրանցից ստացուած վաշխին անհամեմատ աւելի
մեզմ էին վերաբերում։ Ի՞նչն էր այս տարբերութեան
պատճառը։ Այն, որ փողային վաշխառուական կապիտալը
սարսափելի աւերածութիւններ էր գործում այն ժամա-

1) Մուրաց. երկաս. եր. 445:

2) Նոյնը, եր. 447:

3) Նոյնը, եր. 500:

նակուայ հասարակութեան մէջ. այն, որ հէնց այս կապիտալը «կորստեան մատնեց իտալիան»,⁴⁾

Վաշիլը կարիքի զաւակն է. ինչպէս կարիքն է, այնպէս է և վաշիլը Որտեղ փողի կարիք չկայ, այնտեղ փողի վաշխառութիւն զարգանալ չի կարող: Որինակ, Աքովեանի գիւղացին անշուշտ չէր ընկնի փողով վաշխառուի ճիրանաբի. մէջ իսկ որտեղ փողի կարիք կայ, փողով վաշխառութիւնը գործում է, ինչպէս բոցավառ հուրը աշնանային շամբի մէջ:

Նշանակում է՝ գիւղի աղքատութեան հիմնական պատճառը վաշխառութիւնը համարելը մեծ մոլորութիւն է: Բարդ մեքենայի շարժումների պատճառը ոչ թէ մեծ կամ փոքր անիւներն են, այլ այն ոյժը—շոգին կամ երեքտրականութիւնը, որ գործում է մեքենայի մէջ, բայց չի երևում գիտողի աչքին:

Գիւղացի գասակարգի անկման պատճառը ոչ թէ վաշխառութիւնն է, այլ փողային տնտեսութիւնը, որ փողի կարիք առաջացնելով պարարտ հող է պատրաստում փողով վաշխառութեան համար:

4) Н. Бельтовъ. «Къ вопросу о развитіи монистического го взгляда на исторію. СПБ, 1906, бр. 455: Фողով վաշխառութեան հակառակ են նաեւ չին ու նոր կտակարանները: Միսիթար Գօշը «Թատառատանգիրը Հայոց»-ի Բ. մասի ԽԶ. յօդուածով նոյնպէս արգելում է փողով վաշխառութեանը:

«Ճին կտակարան եւ նորս յայսոսիկ միարանին ի բաց բառնալ զվաշի եւ զտոկոսիս. ոչ աստ տոկոսի յիշատակելով զվաշի թողարուցանէ, զի զծայրն բառնալով ընդ նմին եւ զարմատն բառնայ: Եւ որ ինչ ի նոր կտակարան է սասան, աւելորդ է իրը զիտողաց երկրորդել, զի թէ եւ օրէնքն ոչ հրամայէ ճեպել, ո՞չափ եւս նորս: Եւ փոխ ասացաւ, զի անդրէն հատուցի գլուխն. Արդ իրաւունք դատասանի լիցին ներմամբ առնուլ գլուխն, եւ վաշի լիցին հատուցումն հանդերձեալ: Ապա թէ կար իցէ փոխառողին, տացէ փոխատուին զնոյն զլուխ մնալ առ նմազնոյն չափն եւ այդ բատ կարիքից, զի Աստուծոյ ինքն իսկ է դատասանի՝ ոչ առնուլ վաշի եւ տոկոսի: . . .» Միսիթար Գօշի «Թատառատանգիրը Հայոց» Վաղարշապատ, 1880, бр. 557:

VII.

Մուրացանի նկարագրած հայ գիւղում «սերմանում է» փողով վաշխառուն:¹⁾

Այս «հատիկները» չեն թափւում ոչ ճանապարհի վրայ, ոչ էլ քարքարոտ տեղ, ոչ էլ փշերն են խեղդում նրանց, այլ բոլորն էլ ընկնում են փափուկ հողի մէջ և վաղվազակի բուսանելով տալիս են մէկին տասը, մէկին քսան, մէկին երեսուն ու աւելի:

Սկզբում «սերմանում է» քաղաքացին:

«Գիւղացին քաղաքում պարտք է վերցնում տոկոսով և... յաւիտեան ստրուկ մնում վաշխառուի ձեռքին: Այնուհետեւ նրա տունը, տեղը, անասունը, այգին վաշխառուի ստացուածքներն են: Պարտապան գիւղացին գողալով է իւր պարտատիրոջ երեսը տեսնում: Նրա տարած ընծաները՝ կաթ, ձու, մածուն, կարագ կամ հաւ, որ նա շարունակ իւր երեխաների բերանից է խլում, վաշխառուն

1) Փողով վաշխառութեամբ է պարապում նաեւ «աղէն» Յ. Յովաննիսեանի «գիւղի ժամը» անունով յայտնի բանաստեղծութեան մէջ:

Ա՛յս, նազու ջան, չե՛ս իմանում՝

Էգուց էլի աղէն կդայ:

Նրա սիրտը միշտ անկշտում,

Էլ ամպի պէս պիտի գոռայ:

«Նուտով, Գըբգոր, փողերը բե՛ր,

Էլի չկայ, կովդ հանի...»

Ա՛յս, նազու ջան, այն ի՞նչ բան էր,

Միտդ է հերու... Տէր, գու փըկի:

Հայրիկի արդեն զնացել է,

Որ փող նարի. Երբ պիտի գայ:

Տեսնենք, մէկը խղճացե՛լ է...»

Ա՛յս, ու օքը Տէրն էլ չտայ:

Յովհաննէս Յովհաննիսեան. «Բանաստեղծութիւններ» Մոսկուա, 1887, бр. 59—40:

ընդունում է իրեւ իրեն հասանելի եկամուտ, սակայն առանց զիւղացու պարտքից մի սեւ փող իջեցնելու»⁴⁾

Առատ է վաշխի հունձը. գիւղի քահանան անդամ մտածում է վաշխով հունձ անելու մասին: «Նոյի ագռաւի» մէջ երիտասարդ Մինարեանի հարցին, թէ ինչու եկեղեցու բակում պարտէղ չի տնկուած, Տէր-Մակուչը պատասխանում է.

«Ախար ըստի հող փորելու, ծառ տնկելու, չափար քաշելու հըմար փող ա հարկաւոր թէ ոչ ես փող որդիան գթնեմ. փող որ ունենամ, իսի դինց դատարկ բաների կտամ, հրէն, այ, խոջա Մարութը թումանին երեք շահի շահ ա տալիս (18%). առում ա. «Մ. դէր, թէ որ հարիւր մանէթ բերես, քեզ տարին տասնութ մանէթ շահ կտամ Տամութ մանէթը գիւղաս, մի տուն քիւլ փաթ կկառավարի, ամա հարիւր մանէթն ինձ ով ա տուել»²⁾

Տէր Մակուչից պարտք ուզողը մի վաշխառու է: Բայց ինչու վաշխառուն փոխանակ պարտք տալու՝ ուզում է ուրիշից վաշխով պարտք վերցնել: Միթէ նա մի ապաշխարող գայլ է, որ իսկան հանգստացնելու համար իր կաշին ուզում է յանձնել ուրիշի ատամնելին: Ոչ, փողի պահանջը գիւղում այնքան մէծ է, որ Խոջա Մարութի ունեցած փողը չի բաւականացնում վաշխով պարտք տալու համար, ուստի նա օրանից-նրանից համեմատաբար փոքր տոկոսով առնելով աւելի մեծ տոկոսով տալիս է մի ուրիշից:

«Գնացի, Խոջա-Մարութից էրկու հարիւր մանէթ պարտք արի թիւմանին մի աքասի շահով (24%) ու մին ամիս ժամանակով», — յիշում է Վեդունց Սարգիսը⁵⁾

Կան և աւելի քաջագործները: Սրանցից մէկն է և Խոջա Միրգան, որի մասին «Առաքեալի» մէջ բաւական ըն-

դարձակ պատմում է Մուրացանը⁴⁾ Այս վաշխառուն մի խեղճ գիւղացու, ծերունի Սայուն պարտք էր տուել 20 լուրջի և չորս տարուց յետոյ պահանջում էր 131 ր. 7 կոպէկ... (60%)

«Ես լաւութիւն եմ արել, հօ վատութիւն չեմ արել, — բացականչում է գիւղի բարերարը: — Մարդը սոված ա էլել, փող եմ տուել. սերմացու ա առել, ցանել ա, հնձել ա, չորս տարի ապրել ա...»²⁾

«Հրէն ուրիշները մի ամսումը մանէթին 10 եա 12 կոպէկ են առնում (120 և 144%). Ես 5 եմ հաշուել. սրանէ էւել խղճմտանքով բան կըլի՛»³⁾

Մուրացանի երկերից հանած այսքան հատուածները պարզ վկայում են, թէ հայ գիւղը ինչ գրութեան մէջ է:

Աբովեանի նկարագրած հայ գիւղը մի ծաղկած այգի է, որի ծառերի ոստերը գաղանաբար ջարդել ու կտրատել է հրոսակը: Մուրացանի նկարագրած հայ գիւղը ձմեռանամուտի պարտէղ է. գետինը սառել է, արմատները՝ գօսսացել, գեղնատերեւ սաղարթը մահաշունչ սօսափիւն է արձակում...

«Առաքեալի» հեղինակի պատկերացումը ամենեին չափազանցութիւնն չէ:

Մի մասնագէտ գիւղատնտես շրջելով գաւառները հետեւեալ մույլ գոյներով է նկարագրում հայ գիւղերի գրութիւնը:

«Հողը քիչ, չափազանց քիչ, ուժասպառ, հալից ընկած: Անասունը քիչ, վտիտ, սոված, անոյժ, անկաթ:»

Դրանց տէրը, դրանցով ապրողը տգէտ, թշուառ, իր հողից էլ ուժասպառ, իր անասունից էլ սոված ու վտիտ: Ողջ երկիրը ամայի:...

Մենք անցնում էինք կուլտուրական անապատների մի-

1) Մուրացանի երկասիրութիւնները, Ա. հատոր եր. 322:

2) Նոյնը, եր. 25:

3) Նոյնը, եր. 292:

ջով, կենդանի մարդկանց գերեզմանների միջով...
Եւ մեծ, անծայր, անվերջ էր այդ գերեզմանը։ Դա
ժամանակակից հայ գիւղացիութիւնն էր, հայ գիւղն էր,
անտէր, սոված, ուժասպառ հայ գիւղը և նրա հանդերձաւ¹⁾
Փողը տիրել է հողին. գիւղը թարտում է քաղաքի
ցանցերում։

Արամազդը, լիութեան ու պարարտութեան ծերունի
աստուածը, ծնկաչոք հեկեկում է քրքջացող ու յաղթա-
կան Հերմէսի առաջ։

VIII.

Երբ տնտեսութիւնը զարդանում է, առաջանում են
նոր կարիքներ. նոր կարիքների գոյութիւնն իւր վրայ է
դարձնում մարդկանց ուշադրութիւնը, այսինքն ուղղու-
թիւն է տալիս հասարակական մտքին. միտքը հնարում է
միջոցներ կարիքները լրացնելու համար, որով և ասպարէզ
են գալիս հասարակական գործունէութեան նոր իդէալներ։

Հասարակութեան կացութեան յեղաշրջմանը յաջոր-
դում է մարդկանց գիտակցութեան փոփոխութիւնը։
Իդէալը հլու քայլում է մատերիայի յետելից։

Տեսանք, որ տնտեսութեան զարդացումը գիւղում
առաջացրել է նոր կարիքներ. այս կարիքներին բաւարա-
րութիւն տալու միջոցներ պէտք է փնտռուէին, պէտք է
կազմուէին գիւղին ծառայելու ծրագիր ու գործունէու-
թեան նոր իդէալ։

Եւ, իրօք, Մուրացանի վերսիշեալ երկերը քննելով
նկատում ենք, որ նրանք ոչ միայն պատկերացնում են
գիւղի թշուառ գրութիւնը, այլ և պարունակում են հա-
սարակական գործունէութեան նոր իդէալ ու գիւղը փըր-
կելու ծրագիր։

1) Ա. Աթանասեան. «Բոլորիս ուշադրութեանը». «Մշակ» լրագիր,
1940, № 448։

«Քաղաքներին կեանք մատակարարողը գիւղն է, ինչպէս
և ազգի կենդանութեան ոյժ տուողը՝ գիւղացին։ Ով որ
ընդունակ է ազգի կենդանութիւնը զօրացնել, նա պիտի
գիւղը գայ գործելու, զի ծառը ջրելու և ուռճացնելու
համար նախ նրա արմատները պէտք է յագեցնել...!»

«Առաքեալի» ու «Խորհրդաւոր միանձնուհու» մէջ ամ-
փոփուած է այս «արմատները յագեցնելու» ծրագիրը։

Տեսել ենք արդէն (III գլուխ), որ Մուրացանի հե-
րոսները գիւղացու թշուառութեան պատճառ համարում
են բնութիւնն ու չար մարդկանց. վերջիններս երկու տե-
սակ են, օրինազանցներ ու վաշխառուներ։ Բնութիւնը,
վաշխառուներն ու օրինազանցները գիւղացուն կարողա-
նում են վասել այն պատճառով, որ սա տղէտ է ու
անուսում. ուրեմն գիւղի անկման պատճառներից մէկն էլ
տգիտութիւնն է։

Նշանակում է՝ գիւղի թշնամիներն են.

1. Տգիտութիւնը,
2. Օրինազանցները
3. Վաշխառուները և
4. Բնութիւնը։

Սրա համաձայն էլ գիւղում մզելիք պատերազմը կազմ-
ուած է չորս առանձին ճակատամարտներից։

1. Կոփւ տգիտութեան դէմ կամ գիւղական հասա-
րակութեան լուսաւորութիւն։

2. Կոփւ օրինազանցների դէմ կամ գիւղացու իրաւ-
աբանական պաշտպանութիւն,

3. Կոփւ վաշխառուների դէմ կամ փոխարդարձ օգ-
նութեան հաստատութիւնների հիմնադրութիւն և

4. Կոփւ բնութեան դէմ կամ գիւղական տնտեսու-
թեան բարերումն «Կոփւներից» իւրաքանչիւրը, հարկաւ,
ունի իւր յատուկ զգէնքերը։

1. Տգիտութեան դէմ կուելու կամ գիւղական հա-

1) Մուրացանի երկասիրութիւնները, Ա. հատոր, եթ. 307։

սարակութիւնը լուսաւորելու համար պէտք է գիւղում կանոնաւոր գպրոցներ հաստատել, գեղջուկ մանուկներին ձրի ուսում մատակարարել, մանկական-ժողովրդական գրադարան հիմնել, և հասակաւոր գիւղացիներին ազատ ժամերում և մանաւանդ ժմեռ ժամանակ օդաներում կամ եկեղեցիներում դասեր խօսել և աշխարհի չար ու բարի հետ նրանց ծանօթացնել։¹⁾

2. Օրինապանցների դէմ կռւելու կտմ գիւղացուն իրաւաբանական պաշտպանութիւն ցոյց տալու փորձն ամփոփում է իւր մէջ հետեւել խնդիրները. գիւղացու կալուածքները յափշտակութիւնից ազատել, հարկահանութեան ժամանակ տեղի ունեցող անարդարութիւններն արգելել, գիւղացուց յաճախ անտեղի կերպով պահանջուղ կոռն ու ձրի մշակութիւնը մերժել տալ և, վերջապէս, պաշտօնի մէջ ի վաս գիւղացու՝ զեղծումներ կատարող և արդարադատութեան աչքից խուսափող պաշտօնեաների արարքը մերկացնել։²⁾

3. Վաշխառուների դէմ կռուելու և ընդհանրապէս գիւղացուն մշտապէս կարօտութիւնից ազատելու համար պէտք է դիմել մի ապահով միջոցի.

Այն է՝ սովորեցնել նրան ինքնօդնութեան, որը կայանում է իւր աշխատութիւնը և ստացած անդիւնը տընտեսելու և խելացի կերպով գործադրելու մէջ. Այս միջոցն, արդարե, շուտով չէ լցնում գիւղացու կարօտութիւնը, բայց լինում է հաստատ և տեղական. Մի անգամ արդէն զարթեց տկար մարդու մէջ ինքն իրեն օգնելու գիտակցութիւնը, նա այնուհետեւ ապահովուած է ամեն տեսակ կարօտութեանց դէմ. Միակ, փոքրիկ դժուարութիւնը գիւղացուն այդ բանին վարժեցնելն է։³⁾

Փոխադարձ օգնութեան հաստատութիւններն են. փո-

1) Սուրաց. երկաս. եր. 89—90:

2) Նոյնը, եր. 80.

3) Նոյնը, եր. 504: Ո՞րքան միամիտ ըմբռումն դասակարգային կարիքները վերացնելու մասին:

խատու գանձարանը, հասարակաց շտեմարանն ու հասարակաց նախիրը:

Փոխատու գանձարանը չքաւորին առանց տոկոսի, իսկ կարող գիւղացուն փոքր տոկոսով դրամ փոխ տուող հիմնարկութիւնն է: Հասարակաց շտեմարանը կազմում է գիւղական արդիւնքների տասանորդից, չունեորները տասանորդ չեն վճարում, կարիքի ժամանակ բոլոր գիւղացիներն անխտիր՝ իրաւունք ունեն փոխ բերք վերցնելու՝ փոքր տոկոսով վերադարձնելու պայմանով: Հասարակաց նախիր կազմելու համար ունեոր գիւղացիները նուիրաբերում են իրենց կենդանիների ձագերից մէկ կամ երկու հատ. հասարակաց նախիրը հնարաւորութիւն է տալիս լցնել չունեոր ընտանիքների կարօտութիւնը՝ մէկին մի կամ երկու կոլ նուիրելով, որ նրանց կաթով իւր երեխաներին կերպիրէ, միւսի դաշտը ձրիաբար հերկելով, երրորդի խոտն ու խուրձերը հանդից տուն բերելով, չորրորդի կալպ կալմելով և այլն:⁴⁾

4. Եւ, վերջապէս, բնութեան դէմ կռուելու, գիւղացու աշխատանքն արտադրական դարձնելու կամ տնտեսութիւնը բարւոքելու համար պէտք է նրա երկրագործական, այդերանական, անասնապահական, հաւաքուծական և այլ այսպիսի աշխատութիւնները կանոնաւորել, իոկ այդնպատակին հասնելու համար պէտք է սովորեցնել գեղջուկին գիտութեան մշակած ձեերով տնկելու և պատուատելու, հերկելու և ցանելու, հնձելու և կալսելու, անասուն, հաւ և մեղու գարմանելու, պարտէզ ու բանջարանոց մշակելու գիւրին եղանակները:⁵⁾

Մուրացանի ու իւր հերսոնների կարծիքով այս ծրագրի իրագործումը գիւղացիներին կարող է ազատել կեանքի գառնութիւններից ու հացնել մի երջանիկ դրութեան:

Գոսացած արմատների մէջ կը զարթնի կենդանութիւնը.

1) Սուրաց. երկաս. եր. 504—505 եւ 90:

2) Նոյնը, եր. 90 եւ 506:

Հանգչող կրակն արագութեամբ կը բոցավառուի. հայրենի
աւերակը վերստին կշենանայ:

Անդամալոյծ գիւղը կառնէ իւր մահիճն ու կը դնայ:

IX.

Ասացինք, որ հասարակական կարիքներն անպայման հարկադրում են մտքին հնարելու միջոցներ, որոնք բաւարարութիւն տային այս կարիքներին: Բայց այս չէ նշանակում, որ երբ գոյութիւն ունի հասարակական կարիք, իսկոյն էլ գտնում է յարմար միջոց: Երբ հասարակական զարդացումը թեւակոխում է նոր շրջան, ամենախելօք ու զարդացած գլուխներն անդամ չեն կարողանում հասկանալ իրերի ընթացքն ու յարմար իդեալներ ու ծրագրեր մշակել. ճիշտ այնպէս բժիշկը սկզբնական շըրջանում չի կարողանում հիւանդութիւնն որոշել և դժուարանում է գեղեր նշանակել: Իսկ երբ զարդանում են նոր կարգերն ու լիովին երեանեն գալիս սրանց էական յատկանիշներն, այն ժամանակ հեշտութեամբ գտնում են իրագութելի իդեալներ ու ծրագրեր:

Տնտեսական նոր կարգերի առաջին շրջանը ուտոպիզմի ոսկեդարն է, իսկ վերջին շրջանները՝ ըէալիզմինը:

Մուրացանի երկերում գտնուող՝ գիւղը փրկելու յիշեալ ծրագիրը գիւղացիական ուտոպիզմի մի տեսակն է: Այս հեղինակի օրերում — և գեռ մինչեւ այժմ էլ — կովկասում, մանաւանդ հայաբնակ վայրերում, նոր տնտեսական կարգերը գեռ ևս շատ հեռու էին զարդացման գագաթնակէտից: Այն երկում, որտեղ առաջ լսում էին միայն երկրագուծի հորովելներն ու առետրականի սուտ երգումը ները, հաղիւ էր սկսել հնչել մեքենաների աղմուկը. զուարթ երկնակամարը նորանոր էին պատում գործարանի ծխի սև քուլաները և շատ ժամանակ չէր, որ ամայի ձորերի ու հօրանց գնացող արտերի միջով թռչում էին հեացող գնացքները:

Հայ, հասարակութեան մտքի զարդացումն ուսումնասիրողի համար գիւղական գործունէութեան վերոյիշեալ ծրագիրը հետաքրքրական է երկու կողմից:

Նախ այս ծրագիրը կազմողները, Մուրացանն ու իւր հերոսները, մի շարք խնդիրներ լուծելու ժամանակ երբեք քննադատական հայեացը չեն ձգում պետական կազմի վրայ: Օրինակ, ծրագրի առաջին կէտը, ժողովրդի լուսաւորութեան գործը, պետութեան պարտականութիւն չի համարւում, այս մասին պարտաւոր են հոգալու մասնաւոր անհատներ: Գիւղացը իրաւաբանական պաշտպանութեան խնդրում էլ հեղինակի ու հերոսների նպատակն է գոյութիւն ունեցող օրէնքը չի պաշտպանում գիւղացուն վնասող գաւակարգերի շահերը և ուրեմն գիւղացու շահերի տեսակէտից սրբագրւելու կարիք չունի:

Ծրագիրն ուշագրաւ է նաև նրանով, որ ցոյց է տալիս, թէ կազմողներն ամեննեին չէին ըմբռնում ժամանակակից հասարակութեան զարդացման տենդենցները և նպատակ դնելով փրկել գիւղը քայքայումից՝ առաջարկում էին այն պիսի միջոցներ, որոնք երբեք այս նպատակին համել չէին կարող:

Ծրագրի առաջին կէտն իրագործելով, այսինքն լուսաւորութիւն տարածելով հնարաւոր չէ գիւղացիութեան անկման արգելք լինել: Լուսաւորութիւնն առանց արտադրական միջոցների՝ սովամահ լինելու վտանգից փրկել չի կարող: Առետրականների ու կապիտալիստների դասակարգն անպայման աւելի լուսաւորուած է, քան գիւղացիութիւնը, բայց այս հանգամանքն ամեննեին չի խանգարում բուրժուազիայի շարքերի նօսրանալուն: Տնտեսական մրցումն անդադար ձգում է շատերին շահագործողների խմբից շահագործողների մէջ. բուրժուազիան օրէցօր զօրեղանում է նիւթապէս, իսկ թուլանում՝ քանակապէս:

Նոյնը պէտք է ասել նաև գիւղացու իրաւաբանական պաշտպանութեանը վերաբերող կէտի մասին: Օրէնքով

յափշտակութիւնից կարելի է պաշտպանել այն, ինչ որ մարդ ունի ժամանակակից օրէնքը, որ ապահովում է գոյքը, անշուշտ նպաստաւոր է տնտեսական գործունեութեան համար, բայց և անզօր է կոռւելու տնտեսութեան մէջ թագաւորող օրէնքների դէմ: Անգլիայի նման օրինապահ երկում գիւղացիութիւնն այնքան է նուազել, որ կազմում է ազգաբնակութեան չնշն տոկոսը: Ոչ միայն Անգլիայում, այլ և Արևմուտքի ուրիշ երկրներում ամենից աւելի աչքի ընկնող երեսոյթը գիւղացիութեան քանակի նուազումն է: Ժամանակակից հասարակութեան մէջ գիւղացիութիւնը հալում է կամաց կամաց, ինչպէս սառոյցը գաղջ ջրի մէջ:

Գիւղացիների կարօտութիւնները լցնելու համար անհրաժեշտ են համարւում փոխատու գանձարանը, հասարակաց շտեմարանն ու հասարակաց նախիրը:

Փոխատու գանձարանը, ճիշտ է, գիւղացուն ազատում է վաշխառուի ճանկերից, բայց ամեննեին չի կարող գիւղացիութեան գրութիւնը դէպի լաւը տանել, որովհետեւ, ինչպէս ասել ենք, գիւղացիութեան անկման պատճառը փողային տնտեսութիւնն է, որ գիւղացուն շուկայի ստրուկ է դարձնում: Փոխատու գանձարանը կարիքները չքացնել չի կարող, մինչդեռ փողային տնտեսութիւնը ժամ առ ժամ բազմանում է: Ինչպէս որ քաղաքային բանկերը չեն կարողանում քաղաքի ազգաբնակութեան մեծամասնութիւնն ազատել հանապազօրեայ հացից զրկուելու վտանգից, այնապէս էլ փոխատու գանձարանները գիւղացուն չեն կարող ազատել չքաւորութեան ճանկերից, եթէ նոյն իսկ առանց տրկոսի դրամ փոխ տան:

Հասարակաց շտեմարանն ու հասարակաց նախիր կազմելու համար գիւղի ունեւորները պէտք է տասանորդ տան կամ կենդանիներ նուիրեն: Մի բոպէ ենթագրենք, թէ գիւղի հարուստներն այնքան բարի կլինեն, որ կհամաձայնեն իրենց ստացուածքից տասանորդ հանել չքաւորների համար, ենթագրենք, որ տասանորդը բաւարարութիւն տուեց տնանկների կարիքներին, քանի որանք քիչ

են: Բայց միթէ այս թշուառները միշտ սակաթիւ կը մնան, չէ որ չեն վերացուած այն պատճառները, որոնք այսօր քչերին են հասցրել, իսկ վաղը կամ միւս օրն էլ շատ շատերին կը հասցնեն աղքատ Նազարոսի վիճակին: Զէ որ այն ժամանակ գիւղը բաժանուած կլինի երկու բանակի, քչեր, որոնք վայելելու են գիւղական հարստութեան ⁹ | ₁₀ ը և շատ շատեր, որոնց բաժինը լինելու է ⁴ | ₁₀ ը: Զէ որ այս ⁴ | ₁₀ ը այլ ևս չի կարող բաւարարութիւն տալ ծով կարիքներին, և ուրեմն բարեգոր ծութիւնն անկարող կը լինի գիւղը փրկելու անկումից:

Սակայն թողնենք այս ենթագրութիւնները, որովհետեւ հէսց սրանց հիմքը—գիւղի հարուստների բարեգործութիւնը լոկ երեակայութեան արդինք է: Հասարակաց շտեմարանի ու հասարակաց նախիրի կազմակերպման մասին արտայայտուած մտքերը ցոյց են տալիս, թէ Մուրացանն ու իւր հերոսները որքան անտեղեակ են փողային տնտեսութեան ժամանակուայ հասարակութեան հոգեբանութեան հիմնական գծին: «Մարդը մարդուն գայլ» ասացուածքը ամենից աւելի յարմար է գալիս այս շրջանի մարդշկանց: «Բարեկամութիւնը փախաւ, սէրը սառաւ», — գրում է Ազայեանը, բնորոշելով տնտեսական յեղարշըման հետեանք բարոյական յեղարշըմը: Մտածել, թէ բոլոր գիւղերի հարուստներին կարելի է համոզել, որ նրանք տասանորդ հարուստներին կարելի է համոզել, որ նուերներ՝ հասարակաց նախիրին, և ապա այս երկուսից էլ բաժին հանեն գիւղի աղքատներին, որոնք ոչինչ չեն տուել այս հաստատութիւններին, — նոյն է թէ կարծել, որ քաղաքային բուրժուազիան կամովին իւր ստացուածքից բաժին կը հանէ յօւութիւն զոհերի: Մինչդեռ պատմութիւնը վկայում է, որ տիրող դասակարգերն երբեք յօժար կամքով զիջել շատերը համոզուած են, որ գիւղեան տուեալիքների կիրարկումը գիւղական տնտեսութեան մէջ՝ մի հիմնական միջոց է գիւղացի դասակարգի

Մինչդեռ այժմ էլ շատերը համոզուած են, որ գիւղեան տուեալիքների միջոց է գիւղացի դասակարգի

«Հարցւելու» դէմ, Առաջին հայեացքից այս կարծիքը ճիշտ է թւում: «Յիրաւի, — մտածում է մարդ, — եթէ, օրինակ, գիւղացու արտը, որ այժմ շատ անդամ հաղիւ է մէկին երեք արդիւնք տալիս, տայ մէկին եօթ, մէկին տաս և աւելի, այլ ևս ինչ է հարկաւոր գիւղացուն: Նոյնը և գիւղական տնտեսութեան ուրիշ ճիւղերում: Աշխատանքի արտադրականութիւնը զարգացնելը գիւղացու բարօրութեան հաստատ գրաւականն է»:

Նոյն այս կարծիքն է արտայայտուած նաև մեր քննութեան առարկայ համդիսացող ծրագրի չորրորդ կէտում: Սակայն մի օրինակը բաւական է համոզելու, որ գիւղական տնտեսութիւնը գիտութեան տուեալների համաձայն զարգացնել՝ գեռ ևս չի նշանակում գիւղական ամբողջ մասսան տնտեսական տագնապից փրկել:

Ժամանակակից արդիւնաբերութիւնը գիտութեան իւս րաքանչիւր նոր խօսքից աշխատում է օգտուելու Տեխնիկայի, Փիզիկայի, քիմիայի և այլն ամեն մի նոր գիւտ անմիջաւ պէս տեղ է գրաւում դործարանում: Բայց միթէ կարելի է ասել, որ գիտութիւնն արդիւնաբերութիւնը զարգացնելով ապահովում է նաև գործարանատէր գասակարգի բոլոր անդամներին տնտեսական մրցման հետեւանքներից ի հարկէ ոչ: Գիտութիւնը մեծացնում է մարդու տիրապետութիւնը բնութեան վրայ, բազմապատկում է աշխատանքի արտադրական ոյժը, շատացնում է ժողովրդական հարստութիւնը, բայց այս հարստութիւնը բաշխելու վերայ չի ազդում: Ժողովրդական հարստութեան բաշխումը կախումն ունի միայն հասարակական յարաբերութիւններից: Ինչպէս որ մեքենաների զարգացումն արգելք չի լինում կրիզիսների ու յաւելեալ արժէքի գոյութեանը, այնպէս էլ գիւղական տնտեսութեան զարգացումը չի կարող վերացնել: աղքատութիւնը գիւղից: Գիւղական տնտեսութեան՝ գիտութեան տուեալների համաձայն զարգացումը, ընդհակառակը, որում է տնտեսական կուլտն և տնտեսութիւնը սակաւաթիւ մարդկանց ձեռքը կենդրոնացնելով՝ բազմաթիւ գիւղացիների վարձով աշխատող է դարձնում:

Գիտութիւնը ժամանակակից հասարակութեան մէջ միշտ երկուորեակ է ծնում: հարստութիւն ու աղքատութիւն:

Պրոմէթէոսի կրակն է պատճառը հարստի բազմաշահ պալատի և աղքատի մթին նկուղի, մեծատան շուայտ իրավաճանի և տնանկի աղեկտուր քաղցի, ունեորի հնչուն ծիծաղի և չքաւորի լուռ արտասուքի...

X.

Գիւղացիական ուտոպիզմի ներկայացուցիչների գործը լոկ ծրագիր գծելով չի վերջանում: Ծրագիրը հօ ինքն իրեն իրականանալ չի կարող: Ուրեմն ովլ պէտք է այս «բանը մարմնացնէ». ովլ պէտք է գիւղն ազատէ տգիտութեան, օ՛ինազանցների, վաշխառուների ու բնութեան թաթուլներից:

«Խայի գեղցու ցան էն ա, — գանդատում է Զիբուխը լուի տանուտէրը, — որ մէջը մարդ չկայ, մէջքին դայաղ տուող չկայ: ինչ որ աթադան, բարագան տեսե, սովոր, ինենց էլ անում ա, ինենց էլ ապրում ա: Քարճինի ծառ (վայրի տանձի) տեսած կամս, էն որ մէշէն ա հրնում: Էն էն որ թորգեն, խարիր տարի կապրի, հմէն վախտ էլ պստիկ-պստիկ չոր ու ցամաք քարճին կտայ: համա թէ մէ բարի ձեռ նրա ճղերը կտրի ու վրէն պատուատի մաւլաչի դալար շուեր (շիւղ): կտէնաս մէ էրկու տարուց յետայ էդ քարճինի ծառը մալածի տանձեր կրերա, խամով, խոսով ու կերածդ վախտն էլ բերնիդ ջուրը կերթայ: Մեր գեղցին էլ ող կայ, մէշի ծառ ա, քոթուկը՝ խաստ, քոքերը՝ զայիմ, համա բարը քարճին ա, մէ ուստա ծեռ ա պէտք, որ ճղերը կտրի, վրէն պատուատ անի, կուզես մեղրեկինի, կուզես գիւլ-աբի, էն վախտն էլ ընդու բարն էլ էն կըլնի, ինչ որ պատուատելես, խամով, խոսով, սիւսութենովի... Որ օրուանից Աստուած մէ ծառ ա տնկե, անունը խայի շինական որէ, էն օրուանից դէսը էդ ծառի ճղերին մէ մղատող չի (յոտոց) դիպեն, խազար տարի ումբը

ա քաշե, խազար տարուայ բարը հըմմէն վախտ քարճին
ա հէլե ու քարճին։¹⁾

Նոյն կարծիքին են նաև Պետրսս կամսարեանն ու ըն-
կերները։

«Հայ գիւղացին տգէտ, յետամնաց, հետեւապէս եւ
թշուառ է մնում այն պատճառով, որ սոլոր իւր կեանքում
գուրկ է մնում առաջնորդից, սրտացաւ խորհրդատուից,
բարի օրինակից։ Լինէին դրանք, և նա կազմառուէր դա-
րերի ընթացքում իւր վրայ բռնացող ճակատագրական
թշուառութիւնից։²⁾

Արդ ովկ կարող է լինել հայ գիւղի մէջի մարդը գիւ-
ղացու մէջքին դայաղ տուողը, քարճինի ծառը պատ-
շաստուողը, առաջնորդը, սրտացաւ խորհրդատուն ու բարի
օրինակը։

Սեանի երիտասարդ վանականներից մէկը պատաս-
խանում է սոյն հարցին։

—Այս գերը կատարելու պարտականութիւն ունեն
մնաւոր ու նիւթական հարստութեամին օժտուած երիտա-
սարդները, որոնք ամեն տարի տասնեակներով աւարտում
եւ վերադառնում են հայրենիք. իրենց մտաւոր պատրաս-
տութեան շնորհիւ նրանք լաւ ըմբռնում են ժամանակի
պահանջը և ճանաչում ժողովրդի ցաւերն ու կարիքը,
միևնոյն ժամանակ իրենց բազմաթիւ լինելու շնորհիւ նրանք
պատկառելի ոյժ են կազմում եւ այդ ուժով կարող են մեծ
անիներ դարձնել։³⁾

Այսպէս է մտածում նաև Թարսաչայի պոստային վե-
րակացուն, երբ գիմում է կամսարեանին։

«Պէտք է տեսնէք, եղբայր, թէ ուրան բան կայ այդ-
պիսի մի լսեղճ գիւղում անելու. Հաւատացած եմ, որ
շատ պիտի յուղուիք ու վշտանաք՝ տեսնելով այդտեղի
ձեր ազգակիցների գրութիւնը և մինչնոյն ժամանակ յի-

շելով անտարքերութիւնն այն մարդկանց, որոնք կարող էին
օվնիլ գիւղացուն իւր վիճակը սարտոքելու, բայց շարին, որով-
հետեւ չկամեցան։⁴⁾

Որա տրտունջն էլ ուղղուած է

«Այն երիտասարդների ոչմ; որոնք բարձր կրթութիւն
ստանալով, կարողութիւն են ձեռք քերում ժողովրդին ամեն
կերպ ծառայելու, սակայն այդ ծառայութիւնից փախչում
են վատարար».²⁾

Սեանի երիտասարդ վանականի ու Թարսաչայի պոստի
կայարանի վերակացուի նման են մտածում նաև Մուրա-
ցանն ու իւր հերոսները։

—Ինտելիգենցիան է հայ գիւղի փրկիչը, —աղազա-
կում են որանք միաձայն։

Սակայն այս կարծիքը մեզ աւելի է համոզում, որ թէ
Մուրացանն եթէ սրա երկերի հերոսները զտարիւն ուտու-
պի սաներ են, որոնք իրենց բոլոր յոյսը գրել են «հերոս-
ների» վրայ, որոնք զուրկ են մասսաների ինքնագործու-
նէութեան դազափարից և չգիտեն, թէ ինչ մեծ նշանա-
կութիւն ունի պատմութեան մէջ հասարակական խմբերի
պայքարը։

Նոր չէ ուտոպիստական այս համոզմունքը և ոչ էլ հայ
ժողին միայն սեփական. Պատմութեան ընթացքում ամեն
անդամ, երբ փողային ու կապիտալիստական տնտեսու-
թիւնները սկիզբ են գրել գիւղի քայլքայման, միշտ հան-
դէս են եկել ուտոպիստներ, որոնց կարծիքով ինտելի-
գենցիան կարող է կուռել տնտեսական զարգացման օրէնք-
ների գէմ ու փոփոխել առաջացած դրութիւնն իւր իդէ-
պների համաձայն։

—Ինտելիգենցիան կարող է ազատել Գերմանիան կա-
պիտակիզմից, —աղազակում էին 40. ական թուականների
գերմանական ուտոպիստները։

1) Մուրաց. երկաս. եր. 472—474:

2) Նոյնը, եր. 474—475.

3) Նոյնը, եր. 235:

4) Մուրաց. երկաս. եր. 445:

2) Նոյնը, եր. 445:

— Ինտելիգենցիան կը կազմակերպէ ժողովրդական տնտեսությունը, — գոչում էին 70 և 80-ական թուական-ների ռուս ուսուավիստները, նարոդնիկական աշխարհահայ-եագրի ներկայացուցիչները:

Այնուամենայնիւ Ռուսիայում ընկաւ տնայնագործութիւնը, քայլքայուեց համայնքը և անշարժ ու քննութ Աբովյանովի բարձրածայն սուլեցին գործարանները:

— Ինտելիգենցիան է հայ գիւղի վիշտպաքաղը, — պընդում էին և դեռ ևս պնդում են հայ ուստոպիստները:

Սակայն հէնց Մուրացանի երկերը վկայում են, որ հայրենի ևիշտապաքաղիւ վերայ մեծ յոյսեր դնել չի կարելի:

xi.

Ինտելիգենցիայի ու գիւղի յարաքերութեանն են նուիրուած Մուրացանի «Խորհրդաւոր միանձնուհի» վէպը, «Նոյի ագռաւ» զրոյցն ու «Առաքեալ» վիպակը. Այս երկերի վերայ ժամանակագրական կարգով թեթև հայեացք ձգելը կպարզէ, թէ արդեօք հայ ինտելիգենցիան կատարեց այն գերը, որ նրան էին վերագրում, արդեօք հայ գիւղը ինտելիգենցիայի մոգական գաւազանի հպումից կենգանացմա, թէ դարձեալ մնում է նոյն «աւերանոցը», որտեղ հետզհետէ հանդչում է կենդանութիւնը, ինչպէս վկայում է հեղինակի հերոսներից մէկը¹⁾.

4) «Խորհրդաւոր միանձնուհին» առաջին անգամ լրսէ տեսել 1889 թուականին, «Նոյի ափաւը՝ 1899-ին, իսկ «Առաքեալը՝ 1902-ին».

Թէեւ այս աշխատութեան նպատակը չէ դնահատել Մուրացանին, իբրև գեղարուեստագէտի, այնուամենայնիւ պարաք ենք համարում այս մասին մի երկու խօսք ասել ու շեշտել որ այս տաղանգաւոր հեղինակը մինչեւ այժմ ոչ միայն Ծննդեցող ընդհանրութեան, այլ եւ քննադատող փորբամասնութեան կողմից արժանի զնահատութեան չէ հանդիպել։ Ուու-

«Խորհրդաւոր միանձնուհու» հերոսուհին, Աննան, որ
քաղաքային հարուստ, կրթուած ու գեղեցիկ մի օրիորդ է,
ուսուցիչ Գարեգնի պատուէրին հնազանդ՝ ուխտում է լի-
նել միանձնուհի ու նուիրուել «հասարակաց բարոյն»:
Հագնում է կոյսի զգեստ, արհամարհում է կեանքի վայել-
չութիւնները, մոռանում է քաղաքը, թողնում է հովիտն ու
հեռու վանելով կանացի տկարութիւնը բարձրանում է
Սիւնեաց լեռներն և այնտեղ գտնելով մի յետ ընկած գիւղ
արիաբար սկսում է գործել: Օգնում է կարօտ ընտանիք-
ներին խօսքով ու գործով, իւր միջոցներով լրացնում է
նրանց տնտեսութեան կարիքները, հիմնում է ուսումնա-
րան, բարեղարգում է եկեղեցին, հաստատում է փոխա-
տու գանձարան, հասարակաց շտեմարան, կազմում է հա-
սարակաց նախիր, սովորեցնում է գիւղացուն աշխատանքն
արտադրական դարձնելու միջոցներ և այն գիւղը հասց-
նում է մի նախանձելի դրութեան: Քսան տարի աշխա-
տում է քոյր Աննան Ն. գիւղում ու այնտեղ էլ մեռնում:

սահմայ զրականութեան մէջ Մուրացանը վիպական լեզուի առաջին վարպետն է, ինչպէս Յովհ. Յովհաննիսեանը՝ բանաստեղծական լեզուինը։ Վէսպի հմուտ կառուցումով, շրջապատի ու հոգեկան կետնիք նուրբ դիտողութեամբ, այլ եւ ընդհանրապէս իրեն գեղարուեստագէտ վիպասան առ բարձր է բոլոր նախորդ վիպասաններից, իսկ ժամանակակիցներից առաջնութեան զափնին կաթող է զիջել միմիայն Շիրվանդագէին։ Մուրացանի մեծ արժանիքներից մէն էլ նրա բնորոշ իւմրն է։ Օրինակ «Եղի ազգութիւ» մէջ Տէր Մակուչի, իսկ «Առաքեալի» մէջ Տէր Վանու, տիրացու Մոսու, այլ եւ կառապան Ովանէսի հետ կապուած տեսարանները հայ իւմրի փայլուն էջերից են, Մինչդեռ Պարոննեանը ծիծագեցնում է առանց արտասուել տալու, մինչդեռ Ռ. Պատկանեանը ծիծաղի հետ արտասուր խառնելով հանդերձ իւմրը շատ անդամ փոխում է սատիրայի եւ վշտի ամպերի միջից ատելութեան շանթեր է ցոլացնում, Մուրացանը մի հագուագիւտ ծիրով նախ անոյշ ծիծաղում է, ապա յուշիկ հեկեկում առանց ատելութեան փորբիկ նշողին Նա մի գթոտ մարդ է, որ գորսով շայում է իւր զաւակներին, որոնք նրա կրծքից թէ քաղցր բարից եւ թէ դաւն արտասուր են բղիսկեցրել։

Մուրացանի իւմորը նոր էր ծլում եւ անշռւշտ չքեղ փթթելու էր։
սակայն բնութիան իւմորը յաղթող հանդիսացաւ։

Է: Նրա քսանամեայ գործունէութեան հետեանկըն այն է լինում, որ ն. գիւղից արտաքսում են բոլորսվին խռովութիւնը, անուսումնութիւնն ու աղքատութիւնը:

Մինչ Շիլերի կասոանդրան ողբում է իւր վիճակը, որովհետեւ տեսնում է ապագան և զուրկ է ներկայից, ծառայում է հանրութեանը և չունի անձնական երջանկութիւն, Մուրացանի քոյր Աննան կորցնում է ներկան ապագան գտնելու համար և ոգեսորում անձնազոհութեան գաղափարով: Նրա վերջին խօսքերը լինում են, «Մեռաւ ցոյցեանն, զի բազում արգիւնս արացէ»...

Քոյր Աննան ինտելիգենտ գործի մի կատարելատիպ է Մուրացանի համար, և սա համարեա սրբացնում է նրան վեպի վերջին տողերում:

«Ես խորին ակնածութեամբ մօտեցայ շիրիմին և երեկուղածութեամբ համբուրեցի այն: Տապանի վերայ հանգուցեալի ցանկութեամբ փորագրուած էր միայն երեք բառ. «Քոյր Աննայի հանգիստը»: Բայց որքան մտքեր, որքան պատմութիւններ կային այդ պարզ բառերի մէջ... Այստեղ ամփոփուած էր գողտրիկ զգացմունքների, սուրբ գաղափարների և ազնուագոյն ոգեսորութեան մի ամբողջ աշխարհ... Այդ կանաչազարդ շիրիմի մէջ հանգչում էր հայրենիքի սուրբ սիրոյ նահատակը—մարմարացեալ անձնութիւնը, որ որի գէմ չէր գնացել, վառօդի գէմ չէր խիզախել բայց մզել էր նոյն կախը, ինչ որ ամեն մի հերոսու... Ո՞ր ճշմարիտ հայրենասէրը չէր խոնարհիլ իւր գլուխը այդ սրբազն շիրիմի առաջ, և ո՞ր երիտասարդ սրտին սէր ու եռանդ չէր ներշնչիլ «Քոյր Աննայի հանգիստը»...¹⁾

«Խորհրդաւոր միանձնուհու» մէջ Մուրացանը պատսկերացնում է ոչ միայն այն, ինչ որ կարող էր գոյութիւն ունենալ որևէ գիւղում, այլ և այն, ինչ որ կուղենար, որ գոյութիւն ունենար:

«Սակայն այն օրից,—պատմում է ն. գիւղի քահանայ Տէր Յովաէֆը, —որ կոյսը մեր գիւղում է, զրեթէ ոչ

մի տան, կամ ընտանիքում խոռվութիւն ու զժոտութիւն չէ ծագել»:²⁾

«Այժմ մնաք ունինք այստեղ մի «հասարակաց շտեմարան», —տեղեկացնում է կոյս Աննան, —որին իւրաքանչիւր գիւղացի տարուայ մէջ ստացած իւր արդինքից տամաւ է տասանորդ—ցորեն, գարի կամ կորետակ, նայելով թէ ինչ արմտիք ունի ինքը: Իսկ կարօտութեան ժամանակ նա անարդ ել օգուտ է քաղում այդ շտեմարանից վուխառաբար այն պայմանով, որ պարտը վերագարձնէ որոշ տոկոսի հետ: Այդ շտեմարանին տասանորդ չեն վճարում միայն չունեւուները, բայց կարիքի ժամանակ նրանք էլ համահաւատար իրաւունքներով օգտուում են նրանցից: Մենք ունինք նայնպէս «հասարակաց նախիք», որին ամեն մի ունեւոր տարուայ մէջ նուիրում է մի կամ երկու հորթ, նայելով թէ Աստուած ո քան է պարզել իւրեն: Այդ համեմատիք գնալով հարստանում է եւ մենք նորից լցնում՝ ենք ուրծեալ չունեւոր ընտանիքների կարօտութիւնը՝ մէկին մի կամ երկու կով նուիրելով. որ նրանց կաթով իւր երեխաները կերպակէ, միւսի գաշտը ձօփարար հերկելով, երբորդի խոտն ու խուրձերը հանգից տուն բերելով, չորսրորդի կալը կալսելով և այլն»:²⁾

«Ամենից առաջ, —պատմում է գիւղի բարերար միանձնուհին, —ես ուշագրութիւն գարձրի գիւղի աղքատ և անօդնական ընտանիքների վերայ և նրանցից իւրաքանչիւրի կարօտութեան չափն իմանալուց յետոյ յորդորեցի հարուստ գիւղացիներին օգնել նրանց, ինչ բանով որ կարող էին, եւ որովհետեւ գիւղացու համար օրինակն ամեն խօսքից զօրաւոր է, ուստի ամենից առաջ ես սկսայ օգնել կարօտներին: Իմ սեփական միջոցներով գնեցի եղներ, կովեր, այծեր և գիւղացուն պիտանի ուրիշ պարագաներ և բաժանելով այդ ամենից աւելի կարիք ունեցողներին՝ նոյնը անել յորդորեցի եւ հարուստ գիւղացիներին, այն է՝

1) Մուրաց. երկաս. եր. 572:

2) Կոյնը, ել. 504—505:

իրենց աւելորդից մի մի քան յատկացնել չունեւոր դրացում։ Մեծ եղաւ իմ ուրախութիւնը, երբ տեսայ, թէ իմ օրինակն ու յորդորը ապարդիւն չանցան։ Գիւղացիների մէջ զարթեց գեղեցիկ նախանձաւորութիւն՝ միմեանց օգնելու։ Եւ այդ նորութիւնը ոչ միայն հետզիւտէ գիւղի միջից հալածեց աղքատութիւնը, այլ եւ գիւղացիների մէջ հաստատեց սէր եւ բարեկամութիւն սովորեցնելով ընկերին՝ սիրել ընկերոջն եւ օգնել նրան»։¹⁾

Այս երկար հատուածները, ինչպէս և շատ ուրիշները, ցոյց են տալիս, որ տեսնդենցիան հեղինակին «ատիպել է անիրական գծեր մտցնել երկի մէջ։ ցանկալին բաւական տեղ է դրաւել, և «Խորհրդաւոր միանձնուհին» դարձել է գիւղական ուտոպիա։

Մուրացանի այս վէպը վկայում է, թէ հեղինակն ինչ մեծ գեր ու ոյժ է վերագրում ինտելիգենցիային. եթէ կնոջ կամքը կարող է այսքան գործեր կատարել, ապա ինչեր կարող են անել տղամարդիկ։ Ցոյց արդեօք ինտելիգենցիան նուիրում է իւր կոչմանը, արդեօք քոյր Աննան մի բացառութիւն չէ, արդեօք նա մի միայնակ ծաղիկ չէ, որի երեալը գեռ ևս իրաւոնք չի տալիս ասելու, թէ գարունն եկել է։ Վէպի ուշադիր ուսումնասիրութիւնը ցոյց է տալիս որ, յիրաւի, ինտելիգենցիայի փառաբանութեան հետ լսում են նաև տրտունջի ձայներ, մեծ յոյսի մօտ նշմարւում է՝ տակաւին փոքր կառկածը և թէ պէտ ոչ ուժգին, այնուամենայնիւ հնչում են արդէն ինտելիգենցիայի անտարբերութեան հանդէպ հողի վշտի առաջին նուազները։

«Գնացէք հեռու, հեռու, — պատուիրում է ուսուցիչ Գարեգինը, — գէպի կորած հայ գիւղերը, գէպի այն ժողովուրդը, որին մոռացել են մեր զործիչները, որի մէջ որ ըստ օրէ նուազում, հանդչում է կենդանութեան ոյժը»։²⁾

«Եթէ այս հոգւով վառուած մի քանի տասնեակ գոր-

ծիչներ ունենայինք, — բացականչում է »Խորհրդաւոր միանձնուհու գործող անձերից մէկը՝ ակնարկելով կոյս Աննային, — լեռներ կշարժէինք, գետերի ընթացքը կը կասեցնէինք... բայց ուր են այդ զործիչները»։¹⁾

«Բոյր Աննայի մեռնելով, — նկատում է նոյն անձնաւորութիւնը, — մենք կորցնում էինք մինն այն գերազանց ոյժերից, որոնք ծնունդ էին առել վաթսունական թուականներին և որոնց, սակայն, արժանաւոր հետեւողներ չգլունուեցան մինչեւ այսօր»։²⁾

Վէպի ամենավերջին բառերն ել վկայում են, որ ինտելիգենցիան, գիւղի փրկիչը գեռ ևս չի մտածում գիւղի մասին, որն «օրեր է համրում ու նրան սպասում»։

«Իմ աղօթքը մի ջերմ ցանկութիւն էր, տեսնել մեր մէջ, զոնէ այսուհետեւ, քոյր Աննային և նրա ուսուցչին արժանաւոր հետեւողներ»։³⁾

1) Մուրաց. երկաս. եր. 527։

2) Նոյնը, եր. 555։

3) Նոյնը, եր. 559. «Խորհրդաւոր միանձնուհու մէջ ուշադրութեան արժանի են քոյր Աննայի գատողութիւնները գիւղացիների կըրթութեան մասին։ մասնաւորապէս նրա հետեւեալ կարծիքը նշանաւոր է։ «Հակառակ եմ որ գիւղացին իւր մասնաւոր ուսումն ու կրթութիւնն ստունալուց յետոյ գիւղացի լինելու փոխարէն ծգտի լինել մի ուրիշ բան»։ (Նոյնը, եր. 593) գիւղացիութեան իդէոլոգը ամեն կերպ ճգնում է անխախա պահել այս գասակարգի ամրոջութիւնը,

Գրականութեան պատմագրի համար մեծ արժէք ունի նաեւ հետեւեալ հատուածը, որ քոյր Աննային զաղափարակից մի անձնաւորութեան մոքերն է պարունակում։ «Ես ուսուել եմ հեռանալ այնպիսի գիւղ, որ բաղակից կտրուած լինի շատ ու շատ լեռներով։ Յանկանամ եմ ապրել այնպիսի մի տեղ, ուր մարդկանց նետ միասին անհապես անհապես պարունակում է նաեւ բարի մարդութիւնը, որտի անկեղծութիւնը։ Ես յոզնել, ծանծրացել եմ առվրական կեանքից, սովորական մարդկանցից եւ մասնաւոնդ թէ սովորական բարեկամութիւնից, որն իւր մէջ ինձ համար չունի այլ եւս ոչինչ նոր ու չերմացնող։ Այժմ արդէն պարունակութեան մարդին ու երա անխարդախ եւ քեկուզ կիսով չափ վայրենի ընկերակցութիւնը։ Գուցէ այս էլ նեարդային հիւանդութեան քահանձոյք է, ինչպէս քիչէլս է նկատում, չդիտեմ։ (Նոյնը,

4) Մուրաց. երկաս. եր. 498—499։

2) Նոյնը, եր. 486։

XII.

Ունեցան արդեօք քոյր Աննան ու նրա ուսուցիչն արժանաւոր հետևողներ «գոնէ այնուհետեւ»։ Այս հարցին պատասխանում է Մուրացանը ժամանակադրական կարգով յաջորդ գրուածքի «Նոյի ագռաւի» մէջ։

Վեդունց Սարգիսը, գիւղի հարուստներից մէկը, ուշգում է իւր տան յարկի վերաց մի յարկ էլ աւելացնել բայց վանքի վանահայր Օսէփ հայրառուբը նրան խորհուրդ է տալիս, որ փոխանակ փողն այն նպատակով ձախսելու աւելի լաւ է՝ որդուն, մանուկ Վանուն, ուղարկէ ուսում առնելու։

«Հրէն զարկի Թիֆլիս, գիմեազումը կարթի, լաւ ուսում ստանայ։ Ընդիան ետն էլ զրկի Մոսկով եա չէ Պետըրապոլի, որ ունիվերս մտնի, ընտեղի մեծ ուսումն էլ առնի, փիլիսոփ դառնայ։ Էնչաղը կգայ, էս գեղի միջումը մին հատ մարթ կըլի։ Համ իրա ձեռով տանդ գլուխը կշինի, համ էլ միջումը յուսումնարան կրանայ։ Խեղճ են էս գեղցցիքը, խաւար մնացել են, խաւար էլ պտի մեռնեն։ Արանց րեխէքը կը հաւաքի, ուսումն կտայ ու մի քանի տարէն եղը սաղ գեղը կլուսաւորի»։⁴⁾

Հայր սուրբի ասածները նստում են Սարգսի գլխումը, և սա թուղնում է տան շինութիւնն ու Վանուն տանում է Թիֆլիս։ Մի տարի պատրաստուելուց յետոյ Վանին մտնում է

Եր. 544)։ Գրականութեան պատմութեանը ծանօթ մարզը հեշտութեամբ կըմբունէ, որ այս «հիւանդութեան» պատճառները ֆիզիոլոգիական չեն, այլ սոցիոլոգիական։ Ամեն անգամ երբ գարդանում է քաղաքը, երբ զօրեղանում են քաղաքացի դասակարգերը, աղնուականութեան ու զիւղացիութեան իդէոլոգներն իսկոյն «նեարդային հիւանդութիւն» են ստանում եւ փնտրում նախկին մարդն ու նրա վայրենի ընկերակցութիւնը։ Այս «հիւանդութեամբ» էին բնուած, օրինակ, քրանսիացի շատ հեղինակներ ՏԻԿ դարի առաջին բառորդում թէակցիայի ժամանակ։

4) Մուրաց։ երկաս։ Եր. 59—60։

գիմազիան իբրև գիշերօթիկ աշակերտ, որտեղ և մնում է եօթը տարի մինչեւ աւարտելը։ Այս եօթը տարուայ ընթացքում Սարգսի ունեցած փողը ձեռքից գուրս է գալիս, ու նա մնում է գատարկի։ Սակայն Վանին ուշադրութիւն չի գարձական հանդամանքների վերայ ու պահանջում է, որ իրեն ուղարկեն համալսարան։ Որդեսէր հայրը չկամենալով գաւակին ուսումնից զրկել։ Վճռում է ծախել, իւր ունեցած չունեցածն ու Վանու համար «ունիվերս» ի փող ճարել։ Վաճառում է հայենական թթի այգին, յետոյ և ջրաղացն ու ստացածն ուղարկում է որդուն։ Սակայն շուտով այս փողերն էլ են վերջանում։

«Են ա ջլիզ գայամիշ ի էլել, գնացի հայր սուրբի մօտ, ասեցի։ Ա՛ վարդապետ, ամր էլ գմանալու ուժ շունեմ, ինչ անեմ։ Ասեց. ա՛ Սաք, շատին դմացել ես, քչին էլ դմաց, ձիանդ ծախի, եղներդ ծախի, փող հասցրու։ Դու սկի վախիլ մի. աղադ որ եդ գառնայ, իրա սովորած թահըռովը լաւ բազ էլ ա տնկելու, նոր զայդի ջաղաց էլ ա շինելու, եղներդ ու ձիանդ էլ ա շատացնելու։ Ուսում առած տղան որ կայ, նոյի ազաւնին ա, որ ձթենու շիւը բերանումն եդ ա գալիս ու բախտաւորութենի խաբարը բերում ծնողին»¹⁾։

Վարդապետի խօսքերը սիրտ են տալիս Սարգսին և սա սկսում է ձիերն ու եղները մէկ մէկ ծախել ու փողն ուղարկել Վանուն։ Եւ մինչ անձնուեր հայրը անհամբեր սպասում էր, թէ ահա կվերագառնայ որդին, համ պարտքը կտայ, համ իւր ծուած բաները կը դրատի, յանկարծ նամակ է ստանում Վանուց, որով սա հազորդում էր, թէ եկել է Թիֆլիս, ամուսնանում է մի վրացի աղջկայ հետ և մտնում է «զուլուղի», մի խօսքով՝ մնալու է քաղաքում ու գիւղ վերագառնալ չի կարող։ Հիասթափութիւնն ու վիշար կրծում են ծերունի հօր սիրտը։

«Գիտում ի, Վանին Թիֆլիսում պատկուելուց ետք էլ մեղ մօտ չի գալու, վաթանն էլ ա մոքիցը գցելու, հօր

4) Մուրաց։ երկաս։ Եր. 68։

տունն էր, կա ցաւին, գիտաք, գիմանալ չեր ըլիս։¹⁾

Վանին, հօր մօր միակ որդին այլ ևս գիւղ շիվերաւ դառնալու, այն Վանին, որի ժամանակաւոր բացակայութիւնը ծնողներին անպատմելի վիշտ էր պատճառում տարիներ առաջ, երբ նա գեռ Թիֆլիսի գիմազիայումն էր։

«Օր ու գիշեր, —պատմում է այն ժամանակուայ մասին հայրը, —հէնց նրա վրէն ի մտածում եարաբ, ասում ի, բեխաս հօ չմրսեց, եա չիւանդացմաւ եարաբ, եադի տանը բեխի սիրտը հօ չկոտրուեց...» Ամա ինչ որ նրա մէրն էր անում, բերանով ասուել չի ըլիւ Խեղճը ոչ գիշերը քուն սւնէր, ոչ ցերեկը զարար, Տափը, ասես, տեղ չեր տալիս, որ նստի, էն ա ամեն մի ներս ու գուրս աշնելով էնենց էր ախ քաշում, որ ասես ջիգարը պոկ տ գալու, Իեսի սիրտած շունը որ տենում էր թէ հոտոտելով դէս ու դէն ա գնում, ասում էր. Ա՛ Ղաթար, Վանուն ես ման գալի, ըստի չի, քե մատաղ, էնա օխտը սարի քմակին. —ասում էր ու լաց ըլում նախիրը որ հանդումը եղանում էր, հորթերը բռանչում ին, ասում էր. Զան, եարաբ իմ բեխէն էլ ձեղ նման անմէր մնացած բռանշում ա, հու ձէնը լսող չկմյ... —Եփ որ մտնում էր էս բախչէն հու տեսնում ծառերը տանձ ու խնձոր լիքը, ասում էր. Զեր աչքը քուանայ, էդ ուր էք ըլենց կանաչ կարմիր լցուել, ճանքուել (ծանրաբեռնուել), ախար որ Վանին ըստի չի, խիչ չէք չորանում, վէր թափում...»²⁾ Ահա այս սիրտառն զաւակի վարմունքն է, որ բոլորովին յուսահատեցնում է անբախտ հօրը։

«Նրա (Վանու Թ. Ա.) գիրը վեր կալայ, գնացի վանքը՝ էն վախտը Օսէփ հայր սուրբը մեռել էր. Գնացի նրա գերեզմանի առաջին չոքեցի, քարը համբուրեցի ու լաց ըլեւով ասեցի. «Օսէփ հայր սուրբ, լուս դառնաս դու հողովդ ու քարովդ. ախար գու ինձ ասեցիր, որ իմ Վանին նոյի աղաւնին ա, էս ա ձիթենու շիւը բերանում եդ ա գալու,

որ բաղդաւորութենի խաբարը բերի ինձ. բա իսի՞ ըտենց շիւաւ... ախը Վանին հսի նոյի ագուաւն ա գառել, ջամդաքի վրէն նստել ա ու էլ եդ չի գալի. սրա ճարն ինչ կըլի...»¹⁾

Վեգունց Սարգսի կարծիքով Փիրա վաթանը մոռացողը, հօր տունն աչքից ու մտքից գցողը մարդ չի, հայուան առնելուատի զարմանալի չէ, որ Վանու վարմունքը բոլորովին յեղաշրջում է նրա մտածողութիւններն ուսման ու ինտելիգենտի մասին. այնուհետեւ հիասթափուած ծնողն իւր բոլոր ազգեցաւթիւնը գործադրում է այն բանի վերայ, որ թոյլ չապայ գիւղացիներին՝ ուսման տալու իրենց զաւակներին։

«Եփ լսում եմ, մեր գեղականին մինը ուղում ա իրատղին քաղաք զրկի յուսում առնելու, էն սհաթին գնում եմ կանիցը բռնում, բերում մեր հայաթումը կանգնացնում ու ասում. —Տես, որդի, էս Վեգունց Սարգսի շէն օջաղն ա, որ էս օր վէրանա (աւերակ) ա դառել. Ա՛յ, տես, կտուրը ծռուել ա, պէշերը թափուել են, գերանը կախ ա ընկել, գիւղը դարտակուել ա, ու մեղ թացան տուողը մի էծ ա մնացել... Մենք էլ, տեսնում ես, մարդ ու կնիկ ծերացել, մնացել ենք անտէր. ոչ ձեռք կայ, որ մեր գուռը բանայ, ոչ ձէն կայ, որ սրտներս ուրախացնի... էս դիփ նրա մեղն ա, որ ես իմ տղին յուսումի զրկեցի... Վախիր էդ բանիցը, որդի, որդի, բեխէդ քու կշտին պահիր, տանիցդ մի հեռացնիլ, որ իմ Վանու նման նոյի ագռաւ չգառնայ...» ...Հաւն էն չի, որ մեր զեղը յիսուն վար անող տղամարդ էւելի ունենայ, քան թէ հարիր նոյի ազու. Վար անողը հալա հաց կըերի տուն. քուլիաթի ուղղին կկշտացնի, նոյի ազուն ինչի ա պէտք».²⁾

Վեգունց Սարգիսը գիւղացիութեան ներկայացուցիչ է. նա չի մտածում հասալակական ուրիշ խմբերի մասին: Նրա վիշտը միայն անձնական վիշտ չէ, այլ և դաստկարգային,

1) Մուրաց. երկաս. եր. 70:

2) Նոյնը, եր. 74—75:

Նրա հոգաը միայն իւր ընտանիքը չէ, այլ և խաւար դիւզն ու խեղճ շինականը:

«Բա ես իմ էլած չելածը փչացրել, վանին յուսում եմ տուել, որ նա Թիվլիզին պէտք գայ. խի Թիվլիզումը նրա նմանները քիչ կան. եա չէ իմ սիրով շատ էր ցաւում էղ բարբարի (քանդուածի) համար... Ես իմ տղին ուսում եմ տուել, որ առաջ իմ օջախը շինի, իմ հանգած ճրագը վառի. իմ տունը հարս բերելով ինձ ու իմ պառաւին ուրախացնի. եղն էլ իրա ուսումնվ էս խաւար զեղը լուսաւորի, մեր խեղճ ու հայուան շինականին կոռից, պեղառից ազատի... Թիվլիզում Վանին թող հէնց երկնքից հրեշտակ վեր բերի, ինձ ինչ... հրէն, որ երկրում որ լուսաւէտ, եա չէ փանդ ու փելով մարդ կայ հէնց դպա Թիվլիզ ա վաղ տալի. դուք էս մեր խեղճ զեղի դարնը քաշեցէք, որ ոչ տէր ունի. ոչ սրտացաւ...»:¹⁾

Խնտելիգենցիայի անտարբերութեան հանդէպ հողի վշտի նուագները շատ ուժգին են հնչում Վեդունց Սարդուի բերանում, վիշտն աւելի խորն է այն պատճառով, որ ոչ միայն քաղաքացի խնտելիգենտները չեն մտածում գիւղի մասին, այլ և նրանք, որոնք նոյն գիւղի գաւակներն են. Նոյի ագռաւները որանք են և, ինչպէս վկայում է Վանու հայրը, սակաւաթիւ չեն այս «ջամդակ ուտողներն ու տապանը մոռացողները»:

«Հով ա մեղաւոր,—հարցնում է գիւղացիութեան ներկայացուցիչը, —որ գեղի քահանան Տէր-Մակուն ա, հով ա մեղաւոր, որ եղցու առաջը անապատ ա, հով ա մեղաւոր, որ գեղը կեղտոտ ա, աները տափից կպած, հայեաթները թրքով լիքը, քուչերը՝ ծուռ ու մուռ... ասեցէք, տենամ, հով ա մեղաւոր, խեղճ զեղականը, թէ նոյի ագռաւը: Ախար ինչ կլի հմի էս զեղարանքից մի տասը, քսան տղայ զնացել են, յուսում առել, լուսաւորուել. հմի ուր են, ընչի նրանցից մինն ու մինը եղ չեկաւ, որ իրա հօր օջախը վառի, իրա վաթանը պայծառացնի...»²⁾

1) Մուրաց. երկաս. եր. 72—73:

2) Կոյնը, եր. 72:

Այժմ հարցնենք նույից. ունեցան արդեօք քոյլ Աննան ու իւր ուսուցիչը «գոնէ այնուհետեւ» իրենց արժանաւոր հետեւողները:

Ոչ, որովհետեւ տնտեսական զարգացումն ուռածացրել է քաղաքներն ու աղքատացրել գիւղերը: Եւ ինչպէս մագնիսացրած ասեղները ձգում են այն կողմը, որտեղ գլունում է քեւեռը, մագնիսական զօրութեան կենդրոնը, այնպէս էլ ինտելիգենցիան խուժում է քաղաք, որտեղ կուտակուած է հարստութիւնը:

Սիրենաներն երգելով գիւժում են նաւորդներին և չկայ մէկը, որ խցէ սրանց ականջները: Նաւորդներն իջնում են յաւերժահարսերի կզզին, իսկ նրանց ընտանիքները ակնապիշ նայում են ճանապարհին ի զուր սպասելով անձկալիների վերադարձին:

XIII

«Առաքեալով» Մուրացանն երրորդ անգամ վերադառնում է ինտելիգենցիայի ու գիւղի յարաքերութեան հարցին:

Պետրոս Կամարեանը, Թիվլիսեցի հարուստ Կիրիլ Կաչպիչի որդին, իրաւաբանական ուսումնական աւարտելու ժամանակ ուսանողական ժողովում հանդիսաւոր խոստումն է անում ընկերներին թէ:

«Որոշել է քննութիւններից յետոյ վերադառնալ և իրեն նուիրել իւր աղքակիցների ամենից աւելի օգնութեան կարօտ գասակարգին, այսինքն մտնել գիւղը և այնտեղ հիմնել օգնութեան մեծ գործ՝ յատկացնելով այդնպատակին իւր հարուստ հօրից իրեն հասանելիք ժառանգութիւնը»:¹⁾

Պետրոսի գիտաւորութիւնն անկեղծ է. նա թէե չէ տեսել գիւղն ու գիւղացուն, բայց միշտ լսել է նրանց թշուառ գրութեան մասին և կարեկցելով գծագրել է գոր-

1) Մուրաց. երկաս. 86—87: Ընդգծումը Մուրացանին է:

ծունէութեան ծրագիր, որն իրագործելու հաստատ մտաշ գրութիւն ունի այժմ։ Լուսաւորել գիւղացուն, իրաւաբանական պաշտպանութիւն ցոյց տալ սրան, ազատել վաշ խառուներից ու բարոքել տնտեսութիւնը գիւղում, — ահա Կամսարեանի կեանքի իդէալը։

Քննութիւններից յետոյ Կամսարեանը վերագառնում է Թիֆլիս ծնողների մօտ։ Եւ մինչ հայրն սպասում է, որ որդին կոկու իրաւաբանութեամբ զբաղուել քաղաքում և փող վաստակել, իսկ ծնողական փառասիրութիւնով լցուած մայրը յոյս ունի, որ նորաւարտ ու գեղեցիկ Պետեան իրեն կընկերանայ Բորժոմ գնալու և ամառն այնտեղ անց կացնելու, — Պետրոսն յայտնում է, որ ծնողներից ոչ մէկի ասածն անել չէ կարող և շուտով գնալու է հայ գիւղերը գործելու։ Նոյն իսկ նրա վրայ աչք գրած, օժտաւոր ու գեղանի Աղելինայի հրապարակը չեն կարողանում նրան յետ կասեցնել մտագրութիւնից։ Պետրոսն արագութեամբ պատրաստութիւններ է տեսնում և ուղևորում գաւառ։ «Երբ քո ձեռքը կստեղծէ գիւղում գովութեան արժանի գործ, — ասում է Կամսարեանի ընկերներից մէկը, — կտեսնես, որ յետոյ լոյս կընկնեն ուրիշ ձեռքեր, որոնք նոյնը կանեն ուրիշ գիւղերում։ Ո՞վ գիտէ, զուցէ հէնց քեզ է վիճակուած կարապետ լինել այն զաղափարական զործին, որ ամփոփում է իր մէջ գիւղական ժողովրդի ապագայ բարօրութիւնը և որի մասին այնքան շատ խօսել ու քարողել է հայ լրագրութիւնը։⁴⁾

Պետրոսի ընկերոջ այս խօսքերից երեսում է, որ գիւղական ժողովրդի բարօրութեան գաղափարական գործը գեռ ևս առաքեալեր չունի և որ Կամսարեանը պէտք է լինի առաքեալների կարապետը, Այս են ապացուցում նաև թարսաչյի պոստի կայարանի վերակացուի այն խօսքերը, որ նա արտասանում է Պետրոսի մտագրութիւնն իմանալու ժամանակ։

«Փառք քեզ, Աստուած, վերջապէս զտնուեց մէկը, որ

4) Մուրաց երկաս եր. 422:

մնը տրանունջը լսեց։ Դուք ուրեմն միակ մեծ մարդն էք մինչեւ օրս իրենց ուսումն աւարտած նայ երիտասարդների մէջ»։¹⁾

Վերակացուի խորհրդով Պետրոսն գործունէութեան վայր է ընտրում Սևանայ լճի ափին ընկած ձապոտիկ կամ Զիբուխու գիւղը։

Քաղաքում մեծացած ու գիւղի երեսն ամենեին չտեսած Կամսարեանն, երբ հասնում է Զիբուխու, վայրիկենապէս հիասթափուում է, տեսնելով այնտեղի ծուռ ու մուռ փողոցները, թմբաձև, հողածածկ ու լոյսից զուրկ աները, աղբի շերտերով ու աթարի փշուրներով ծածկուած գետինը և գարշահոտ քակորի բլրակները։

«Եթէ, իրաւ, սա է հայ գիւղացու բնակավայրը, ապա հազիւթէ հնար լինի ապրել ու գործել այդպիսի տեղ», — մտածում է Կամսարեանը։²⁾

Զիբուխուի տանուտէրի հետ ունեցած խօսակցութիւնը հայ գիւղի մաքրութեան, խեղճութեան ու աղքատութեան մասին աւելի են մտատանջութեան մէջ ձգում նրան։

«Այստեղ հաստատուն կամքի հետ միասին պէտք է ունենալ և մեծ համբերութիւն։ — խօսում է Կամսարեանն ինքն իրեն, — ծառից ծառատակը մշտ մօտ է երեսում, բայց երբ թռչում ես, այն ժամանակ է միայն տարածութիւնն իմացւում։ Մինչև այժմ ես գեռ թռչելու որոշումն չեմ արել, և արգէն տարածութիւնն անհուն է թռում, ինչ կլինի, եթէ սկսեմ թռչել... արդեօք ոյժերս կըներէն, թեւերս չեն թռուանալ...»⁵⁾

Զիբուխու հասնելու առաջին օրը Կամսարեանի գործը լինում է շրջել գիւղում, աւելի ծանօթանալ այն վայրի հետ, որտեղ գործելու է։ Այս ժանօթութիւնն աւելի է խախտում Պետրոսի հաւատը. ամեն ինչ յուսահատեցնող է

1) Մուրաց երկաս եր. 444:

2) Նոյնը, եր. 465:

3) Նոյնը, եր. 476:

գրւղում, ամեն ինչ վանոց նոյն իսկ հայ գեղջկուհին, որի զմայլելի գոյներով նկարագրութիւնը կարդացել է Արսվեանի վեպում, այժմ բոլորովին այլ, բոլորովին մուայլ երանդներով է հանդէս գալիս Կամսարեանի, գիւղի առաքեալի, առաջ:

«Դժուար է, շատ դժուար է, այստեղ ապրել»—նկատում է Կամսարեանը՝ զլուխը շարժելով ամբողջ օբույ շրջադարձութիւնից յետոյ:

«Խա, քե նման ազա մարդու խմար դժար» ա,—հաստատում է տանուտէրը:¹⁾

Հետևեալ առաւտեան Պետրոսի հոգում արդէն կատարեալ պայքար է սկսուած: Գաղափարական «ես»-ը ցանկանում է գործել գիւղում ու շնչում է Կամսարեանի ականջին.

«Ես, եթէ կարողանայի, եթէ հնարաւոր լինէր...»
Իսկ անձնասիրութեան «ես»-ն էլ ուրիշ երդ է երգում.
«Ի հարկէ, չես կարող, ի հարկէ, անհնար է, այս ժողովրդի կեանքն ու վիճակը քսաներեք դար առաջ այսպէս է նկարագրել Քսենոփոնը, քսաներեք դար յետոյ էլի այսպէս կը նկարագրէ մի ուրիշ Քսենոփոն... այստեղ դու ոչինչ տնել չես կարող»:

Յաղթանակը տանում է անձնասիրութեան «ես»-ը, և Կամսարեանը վճռում է.

«Ոչ, անկարելի է, մեր ուժից վեր է... դա միայն ցնորք է և բանդագուշանք. ես ի զուր եմ այստեղ ժամավաճառ լինում»²⁾

Բայց գիւղը թողնելու վճիռը Կամսարեանն իսկոյն չի իրագործում, որովհետեւ կամենում է տեսնելնակ Սեանի մենաստանը, որ Զիբուխուի մօտ է գտնուում: Մենաստանում էլ Պետրոսը տեսնում է յետամացութեան ու անշարժութեան օրինակներ: Այս փոքրիկ ճանապարհորդութիւնից յետոյ նոյն օրը Կամսարեանը վերադառնում է

1) Մուրաց. երկաս. 220:

2) Նոյնը, եր. 225—224:

Զիբուխու, որտեղ օրը մթնացնելու համար այցելում է տիրացու Մոսու խալֆայական գպրոցը: Այդ օրը Պետրոսը պատահմամբ մի բարի գործ է կատարում: մի խեղճ գիւղացու աղատում է վաշխառուի ճանկերից:

Երկրորդ գիշերն էլ Պետրոսն ստիպուած է լինում մնալ Զիբուխուում: Նակառակի պէս գիշերը սաստիկ փոթորիկ է բարձրանում, և Կամսարեանը հարկադրուած է լինում մտնել գիւղացու սենեակներից մէկը, որտեղ սակայն հանգստութիւն չէ գտնում միջատների ձեռքից: Վերջապէս անձրւել դադարում է, որով Պետրոսը հնարաւորութիւն է ունենում դուրս գալու տանուտէրի բակն ու այնտեղ գիշերել:

Քաղցը երազները փոխադրում են երիտասարդին Բորժում, Կամսարեանը դանուում է իրենց ամառային բնակարանում և վայելում է մաքուր ու համեղ նախաճաշ: Ահա և «Հանքային» պարկը կարկաչահոս Բորժոմկայի ափին: Երիտասարդների, տիկինների մի բազմութիւն զուարճանում է զանազան խաղերով: Յանկարծ մէկն տուաջարկում է Բորժոմկայի եօթը կամուրջներն անցնելով մի զբոսանք կատարել: Ամենքը համաձայնում են:

«Կամսարեանն, ի հարկէ, իւր թեւն է առել չքնաղ Աղելինային, որ այդ վայրկենին քնքոյշ էր աւելի, քան գարնան վարդը, գրաւիչ ու քաղցրաբոյր՝ քան ծաղկոցի շուշանը և սիրախօս ու գեղաձայն, քան այգածին սոխակը... Զորբորդ թէ հինգերորդ կամուրջներն էին անցնում, երիտասարդը չէր յիշում, և ահա իրտ ծառերի մի սիրուն պուրակ շրջապատեց նր նց: Մի վայրկեան նրանք տեսան իրենց միայնակ և կանգ առին հովանաւոր ծածկարանի մէջ: Գեղանի: Կուսի լուսավառ հայեացքը սևեռուեց երիտասարդի սիրայոյդ աշերին, և վարդագոյն շուրջերը ժպակի աննման ծիածանի միջից շնչացին կիսաձայն,

— Ինչու այդքան ուշացար... Եթէ գիտենայիր, թէ մըքան անձկութեամբ էի սպասում քեզ... մըպիսի կարօտով իմ օրերն անցնում...:

Եւ շուշան բազուկները պատեցին իսկոյն պարանոցը

երիտասարդի, որ գրկեց նրան քնըշաբար և սեղմեց կրչծ՝
քին մեղմով... Հյուտապ շուրթերը հանդիպեցան իրար,
և արքայութիւնը մի վայրկեան իջաւ երկրի վրայ...»¹⁾

Սակայն երազի ամենաքաղցր լոռէին տանութերի
կովը բակում ահեղաձայն բառանչում է, և կամսարեանը
քնից վեր թոշելով տեսնում է, որ առաւօտ է, և ինը,
աւազ, գտնուում է չարաքաստիկ Զիբուխուում:

„Փյ, ուո զա նեօճրազ!“—«աղաղակում է երիտա-
սարդը և արագ հագնութելով նստում է պոստային կառքն
ու փախչում Զիբուխուից՝ շունչը Բորժոմում իրենց ամա-
րային բնակարանում առնելով։ Ծնողները ցնծութեամբ
ընդուում են «կուօների» երկրից փախած որդուն։

Նոյն օրը երեկոյեան Բորժոմի անտառապատ բար-
ձունքներից մէկի վերայ, մի գեղեցիկ պարկում տեղի է
ունենում գիւղի փրկչի ու գեղանի Աղելինայի հանդի-
սաւոր նշանագրութիւնը...

Մեծ յօյսեր տուող առաքեալը դառնում է գաղա-
փարի մի ամենասովորական դասալիք։

Այսպիսով այն հարցին, թէ ունեցան արդեօք քոյր
Աննան ու իւր ուսուցիչն արժանաւոր հետեղներ, Մուրա-
ցանը վերջին անգամ պատասխանում է բացասաբար։

Հապա տգիտութեան, օրինագանցների, վաշխառու-
ների ու բնութեան դէմ մղելիք կոթւը. միթէ այլիս չի
կարելի յուսալ այս կուի յաջողութեան համար։ Հապա
անուսում, թշուառ ու ազբատ շինականը, գլխակոր Սային
ու թոռները և օրն ի բուն տքնող Աւանանց րեխէքը. մի-
թէ այլ ևս չի կարելի հաւատալ որ սրանց դրութիւնը
երբ և իցէ կարող է բարւոքուել։ Հապա մոռացուած ու
անտիրական հայ գիւղելը. միթէ բոլորովին պէտք է մարի
կենդանութեան կրակը, որ նրանց մէջ հազիւ հազ է առ-
կայժում։

«Առաքեալ» վիպտկի վերջին խօսքերով Մուրացանը
շատ որոշ պատասխանում է այս հարցերին։

Կամսարեանի ու Աղելինայի նշանագրութեան համ-
դէաը նկարագրելուց յետոյ հեղինակը հարցնում է.

«Իսկ Զիբուխուլուն... Սկանը...»

Եւ ապա որտի խորին կոկիծով հետեւալ պատաս-
խանն է տալիս։

«Երանք դպիծեալ մնացին իրենց տեղն անշարժ ու ան-
փոփոխ, ինչպէս հարազատ մնասունք անփոփոխիլի յաւի-
տենականութեան...»¹⁾

Գիւղի փրկութեան գործը վերջնականապէս տա-
նուլէ տուած, որովհետեւ ինտելիգենցիան խմել է Լետայի
ջրից, մոռացել է Աւետեաց երկրի խօստումներն և Ահա-
րոնի պէս երկրպագում է սոկեայ հորթին։

Հանդել են բոլորովին յօյսի ջահերը։ Հողի վշտի նուագ-
ները փոխուել են մահերգակ մեղեդիների։

Սոյն աշխատութեան նպատակը—հայոց նոր գրակա-
նութեան մի փոքրիկ ածուի ուսումնասիրութիւնը, Մու-
րացանի երեք երկերի, այն է՝ «Խորհրդաւոր միանձնուհու»,
«Նոյի ագռաւի» ու «Առաքեալի» պատմական-գրական վեր-
լուծութիւնը—կատարուած կարող ենք համարել։

Այս վերլուծութիւնն երեան հանեց, որ հայ գիւղի
ներկալ թշուառ դրութեան պատճառը փողային տնտե-
սութիւնն է, որն անհրաժեշտորէն տանում է գէպի գիւ-
ղացի գասակարգի անկումը։ Տեսանք, որ Մուրացանն ու
հերոսները, իրեւ գիւղացիութեան իդէոլոգներ, նպատակ
ունեն պահպանելով գիւղացի գասակարգի ամբողջութիւնն
և բարւոքելու տնտեսական դրութիւնը։ Նրանք ուտոպիստ-
ներ են և, չըմբռնելով անտեսական զարգացման օրէնքները՝
կուռում են հետեանըների դէմ առանց պատճառները վե-
րացնելու, ուստի նրանց գիւղը փրկելու ծրագիրը չի կա-
րող վերացնել շինականի ազքատութիւնը։ Նրանք ուտո-

1) Նոյնը, եր., 307—308։

1) Մուրաց. երկաս. եր. 556։

պիստներ են և չիմանալով հասարակական խմբերի պայքարի նշանակութիւնը՝ յոյսները գրել են ինտելիգենցիայի վերայ, որ հնարաւորութիւն չունի ի կատար ածելու և չէ էլ ի կատար ածում նրանց իդէալները։

Մուրացանի պեսսիմիզմի պատճառը նշան ու տուպիզմն է։ Գիւղը, որ նկարագրուած է այս հեղինակի երկերում, փողային տնտեսութեան շրջանի գիւղն է, Այս տնտեսութեան շարիքները հայ գիւղի թշուառութիւններից վերաջնները չեն, հայ գիւղը գեռ և խմելու է նաև դառնութեան այն վերջին բաժակը, որ այժմ խմում են տընտեսապէս զարգացած ուրիշ երկիրների գիւղերը։ Հայ գիւղն ենթարկուելու է կապիտալիզմի շարիքներին։

Աւտոպիստներին սարսափեցնում է այս հեռանկարը։ Սակայն ով ուտոպիստ չէ և գիւղական թշուառութիւնները վերացնելու համար տնտեսութեան յեղաշրջումը կատարելու չի ձգտում, ով աղքատութեան մէջ ոչ միայն աղքատութիւն է տեսնում, այլ և փրկարար մեծ ոյժ, նա գիտէ, որ կայ պատճական մի այլ հեռանկար էլ։

Երբ կապիտալիստական տնտեսութիւնը կըսկսէ աւերածութիւնները նաև գիւղում, երբ այստեղ էլ կը կենդրունանայ հարստութիւնը սակաւաթիւ ձեռքերում, կը զարգանայ սակաւահողութիւնը, կը բազմանան սեփականազուրկները, ազգաբնակութեան մեծամասնութիւնը կապրէ իւր բազուկների ոյժը վաճառելով և երբ, իրեւ հետեանք այս բոլորի, գիւղում էլ ուժգին կը հնչուի միիթարիչ ձայնը, որ կանչում է իւր մօտ բոլոր վաստակեալներին ու բեռնաւորներին, այն ժամանակ կընչէ կապիտալիստական հասարակութեան վերջին ժամը։

1911 թ. օգոստոս.

Մեծ Պարամիլիստ:



Բ Ո Վ Ա Ն Գ Ա Ռ Ի Թ Ի Ւ

Երես	
I. 19-րդ դարի առաջին յիսնամեակը հայ կեանքում	3.
II. Գիւղի աղքատութիւնը Մուրացանի երկերում	7.
III. Տնտեսական յեղաշրջում 19-րդ դարի երկրորդ յիսնամեակում	9.
IV. Փողային տնտեսութեան ազգեցութիւնը գիւղացիութեան վրայ	11.
V. Փողային տնտեսութիւնը գիւղում	15.
VI. Բերքով ու փողավ վաշխատութեան տարբերութիւնը	18.
VII. Փողով վաշխատութիւնը գիւղում	21.
VIII. Գիւղը փրկուլու ծրադիր	24.
IX. Գիւղացիական ուտոպիզմ	28.
X. Ինակելիզենցիան գիւղի վիշապաքաղ	33.
XI. Գիւղապաշտ միանձնուհին ու իդէալական գիւղի պատկերը	36.
XII. Մոռացուած տապանն ու նոյի աղոստները	42.
XIII. Առաքեալը գասալիքը Յոռեահասութեան նուազներ	47.
XIV. Դամնութեան անխուսափելի բաժակն ու յարութիւնն ի մեռելոց	53.



新編中華書局影印

104 of 111



ԹԱՐ. ԱՀԴԱԼԲԵԳԵԱՆԻ

„ԽԱԶԱՏՈՒՐ ԱԲՈՎԵԱՆ“

ՊԱՏՐՈՒԿԵՐՆԵՐԻ ՎԵՐԱՍՈՒԾՈՒԹԻՒՆ

Բռվանդակութիւն. Դասակարգ ու գրականութիւն։ Հոգեորականութիւնն Արովեանի ժամանակ։ Վաճառական դասն Արովեանի ժամանակ։ Գիւղացիութիւնն Արովեանի ժամանակ։ Գիւղ վէպի մէջ։ Վէպի առաջին զլուխը։ Վէպի միւս զլուխները։ Վէպի մասերի արծէքը։ Գիւղացու վերաբերմունքը գէպի երկրագործական աշխատանքն ու զիւղական կեանքը։ Գիւղացու վերաբերմունքը գէպի փողացին տնտեսութիւնն ու վաճառական դասը։ Գիւղացու վերաբերմունքը գէպի հոգեորականութիւնը։ Արովեանի վերաբերմունքը գէպի գիւղական անտեսութիւնը։ Վաճառականութիւնն ու հոգեորականութիւնը։ Մեթոդ ու հետեանփներ։

31173

4620

БИБЛИОТЕКА
ИНСТИТУТА
ВОСТОКОВЕДЕНИЯ
Академии Наук
СССР

807

Գիտել է 20 կոպեկ.

Պէտք է գիմել զրավաճառներին, կամ հեղինակին
այս հասցեով

Игдыръ, Эрив. губ.



67.855